

APOCALIPSIS

O REVELACION A SAN JUAN

1 ¹Yoozqui tii liwruquiz cjiirta puntunaca Jesucristužquiz mazinchiča, Jesucristo niž sirwiñi žoñinacžquiz maznajo. Tii puntunacaqui waji wataquiča. Jesucristuqui niž sirwiñi Juanžquin anjila cuchanžquichiča, tii liwruquiz cjiirtanaca zizta cjejajo. ²Wejr Juanqui tjapa nii zizta puntunacžquiztan cjiiruča, jaknužt wejr nii zizzinžlaja, jalla nužupan. Jaziqui Yooz takumi nižaza Jesucristuž maztami chiyuča. Nižaza tjapa weriž chertanacami chiyuča. Tjappacha werarapan cjiiruča.

³Jakziltat žoñinacžquiz tii Yooziž tjaata takunaca ličhaja, jalla niiqui cuntintuž cjequiča. Nižaza jakziltat tii Yooziž tjaata takunaca nonžaja, nižaza niž jaru kamčhaja jalla niiqui zakaz cuntintuž cjequiča. Tii puntunaca cumplis timpunaca žcatžinžquiča.

JUANQUI ICLIZANACŽQUIN CJIJRČHA

⁴Wejr Juanqui pakallawk Asia yokquin žejlñi iclizanacquin cjiiruča. Yoozqui ančhucaquiz zumpachaj yanapt'ila, nižaza Yoozqui ančhucaquiz walikaj kamkatla. Yoozqui tuquitanpachami anzimi jaztanami wiñayjapa tirapan žejlča.

Yooz mantiz julz yujcquiz pakallawk zuma ispiritunaca žejlča. Ninacaqui ančhuc walikaj kamkatla. ⁵Nižaza Jesucristuqui ančhuc walikaj kamkatla. Jesucristuča lijitum chiiñiqui. Nižaza primir ticziquiztan jacatatchi žoñiča. Nižaza Jesucristupanča tjapa tii muntuquiz žejlñi mantiñi reynacžquiz mantiñiqui. Cristuqui učum ancha okziča. Nekztan učum ujnacquiztan ticziča. Jalla nuž ticžcu, učum liwriichiča, niž ljok tjawkchiž cjen. ⁶Nekztan Jesucristuqui učum utchiča, nižtan chicapacha mantiñijapa, nižaza Yooz Ejpžquiz rispitñijapa. Jalla nii Jesucristuqui wiñayjapa honorchiz cjila. Nižaza wiñayjapa mantiñej cjila. Jalla nužoj cjila. Amén.

⁷Cjuñzna. Tsjii nooj Jesucristuqui tsjir taypiqueiz tjonaquiča. Jalla nuž tjonan tjapa žoñinacaqui nii cheraquiča; Jesucristo quintra pañi žoñinacami nii zakaz cheraquiča. Nekztanaqui tjapa wajtchiz ana criiñi žoñinacaqui kaaquiča, ninaca casticz ora tjonchiz cjen. Jalla nužoj cjila. Amén.

⁸Yooz Jiliriqui tuž cjiča: “Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan

kallantičhaja, nižaza “Z”quin žerzaja, jalla nižtitčha wejrqui tjappachtajapa”. Jalla nuž cjičha tjapa aztan mantiñi Yooz Jiliriqui. Niiqui anzimi, tuquitanami, jaztanami žejlčha.

⁹Wejr Juanqui ančhucaquin cjiyržcučha. Wejrqui ančhuca jiltčha, Jesucristužquin kuz tjaatiquiztanaqui. Učhumqui Yooz mantuquiz kamchiz cjen, sufričha. Pero čhjul sufritami žejlčhaja, Jesucristuqui učhumnacquizimi pasinsis kuzziz cjiskatčha. Wejrqui kot taypiquiz kolta yokquiz želučha, Patmos cjita tii yoka. Jalla ticju preso želučha, Yooz taku parlitiquiztan, nižaza Jesucristuž puntuquiztan maztiquiztan.

JESUCRISTUŽ CHERTA

¹⁰Tsjii Yooz tjuñquiziqui Yooz Espíritu Santuqui wejt kuzquiz ancha tjončičha. Tjonžcu jalla tii watchičha. Tsjii alto jora nonzinčha wir kjutñi, trompetž pekz joražtakaz nonzinčha.

¹¹Nii joraqui tuž cjichičha:

—Wejrtčha primirquiztan tjappacha kalltichintqui. Nižaza wejrtčha tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitčha wejrqui tjappachtajapaqui”. Jaknužt amqui cheračhaja, jalla nii chertanaca cjiyra. Nekztan nii libro pakallawk iclisanacquin apaya, Efeso iclizquin, nižaza Esmirna iclizquin, nižaza Pérgamo iclizquin, nižaza Tiatira iclizquin, nižaza Sardis iclizquin, nižaza Filadelfia iclizquin, nižaza Laodicea iclizquin. Jalla nii Asia cjita provinciquin žejlñi iclisanacquin nii cjiyrtaqui apaya.

¹²Jalla nekztanaqui wir kjutñi kjutzinčha cherzjapa, jectpan nižta paljayzqui, nuž cjican. Jalla nuž kjutžcu tsjii pakallawk kor cantilero

cherzinčha. ¹³Nii cantiler taypiquiz tsjii žonižtakaz tsijtchi želatčha. Niiqui tol zquitchiztačha, nižaza quecquiz tsjii pal kor sinturunchiztačha. ¹⁴Nižaza niiž ach charami chiwitačha, chiw chomažtakaz, nižaza chiw kjatñižtakaz. Niiž čhjucquinacaqui ujžtakaz c'ajatčha. ¹⁵Niiž kjojchanacaqui zuma llijatčha jurnuquiz tjiñanta korižtakaz. Niiž joraqui wacchi kjaz pujquiz kjawñižtakaztačha. ¹⁶Niiž žew kjarquiz pakallawk warawaranaca tanzitačha. Niiž atquiztan pajk ar cuchillužtakaz ulnatčha, porap kjuttan archiz. Niiž yujcqui zmali tjuñižtakaz c'ajatčha.

¹⁷Jalla nii cheržcu, niiž kjojchquiz tjojtsinčha, ticzižtakaz. Niižt wejr lanzičha žew kjaržtan. Jalla nuž lanžcu tuž cjichičha:

—Wejr ana eksna amqui.

Primirquiztanpacha asta wiricama želučha. Wejrtčha juc'ant chekanaqui tjappachquiztanami. ¹⁸Wejrtčha žetiñtqui. Wejrqui ticzinčha. Pero wejtquiz chertzna. Wiñayjapa žetučha. Nižaza wejrqui mantuča ticzmi, nižaza ticz yokami. ¹⁹Jaziqui cjiyraquičha jaknužum cherčhaja, jalla nii. Cjiyraquičha tii timpu watchinacami, nižaza jazta timpu tjonanami, nii. ²⁰Wejt žew kjarquiz pakallawk warawaranaca žejlčha. Jalla nii cherchamčha, nižaza pakallawk cantilerunaca cherchamčha. Ninaca tuž cjičha: nii pakallawk warawaranacaqui pakallawk iclisanacž irpiñinacačha. Nii pakallawk cantilerunacaqui pakallawk iclisanacačha.

EFESO ICLIZQUIZ CHIITA TAKUNACA

2 ¹Efeso icliz irpiñižquin tuž cjiyra: “Tsjiiqui žew kjarquiz pakallawk warawara tanža, nižaza pakallawk kor cantiler taypiquiz ojklajčha.

Jalla niiqui tuž cjiča: ²Ančucaž paatanacami pajuča. Ančucui wejttajapa ancha langža. Nižaza sufrichiž cjenami ančucui tjurt'iñi kuzzizza. Nižaza ančucui ana zum kamañchiz žoñinaca ana cherz pecča. Nižaza jakziltat 'apostultča wejrqui' cjican ojklajčhaja, jalla ninaca wawczinčucča ančucui, werara ana werara jalla nii. Jalla nižtiquiztan jecnacat ana werar apóstol ojklajčhaja, jalla nii zizzinčucča. ³Wejrqui zizuča, ančucui pasinsis kuztan sufriča, wejtquiz criican. Nižaza wejtquiz kuzziz cjen walja awantichinčucča. Nižaza wejttajapa walja langzinčucča, ana ocha nayžcu. ⁴Pero tsjii ujchizza ančucui. Jaknužt ančucui primero tjapa kuz wejttan ancha munazitčhaja, jalla nižta ana tira munaziča. Anz wejttan upa munaziča. ⁵Cjuñzna, jaknužt ančucui primero ancha zuma munaziñi kuzziz cjistčhaja. Nižaza cjuñzna jaknužt anziqi upa munaziñi kuzziz cjistčhaja. Jalla nii cjuñzcu, 'ujchizpantča wejrqui' cjis waquiziča. Nekztan wilta ancha zuma munaziñi kuzziz cjee, wilta zuma kamzjapa. Ana wilta zuma munaziñi kuzziz cjequiz niiqui, am cantileruqui kjañtaž cjequiča; nekztan ančuca icliza tjatanta cjequiča. ⁶Pero ančucaltajapa tsjii zuma obra žejlča, ančucui ana wal nicolaífas parti žoñinacž quintrajapa chjaawjkatčha, jalla nii. Wejrqui ninacž quintrajapa zakal chjaawjkatučha. ⁷Jakziltat nonžni cjuñchiz cječhaja, nonžla Espíritu Santuž iclizziz žoñinacžquiz chiitaqui. Jakziltat anawalinacquiztan atipachhaja, jalla nižquiz wejrqui permiso tjaa-ačha, žeti tjaañi muntiquiztan lulajo. Yooz zuma yokquin žejlča nii zuma muntiqui”.

ESMIRNA ICLIZQUIZ CHIIITA TAKUNACA

⁸Esmirna icliz irpiñižquin tuž cijira: “Tsjiiqui primirquiztanpacha wiricama žejlča. Jalla niiča juc'ant chekanaqui tjappachquiztanami. Niiqui ticziča, nižaza wilta žejtñi cjissiča. Jalla niiqui tuž cjiča: ⁹Wejrqui zizuča, ančucui ancha sufričha, nižaza t'akjiri žejlča. Pero ricachužtakazza ančucui, Yooz wajtchiz žoñinacaz cjican. Judío žoñinacaqui ančuca quintrá ancha anawal takunaca chiiča. Ninacaqui anača ultim werar judionacaqui. Ninacača Satanás diabluž partiquiziqui. ¹⁰Jaknužt ančucui sufračhaja, nuž sufrisquiztan ana tsuca. Cwitasá, diabluqui yekjapanaca ančucaquiztan carsilquiz chawckataquičha, ančucaž ujquiz tjojskatzjapa. Ančucui tunca tjuñi intiru ancha sufraquičha. Ticzama wejtquiz tjurt'iñi kuzziz cjee. Nekztanaqui wejrqui ančucaquiz wiñayjapa žeti tjaa-ačha, tsjii premiužtakaz. ¹¹Jakziltat nonžni cjuñchiz cječhaja, jalla niiqui nonžla, Espíritu Santuž iclizziz žoñinacžquiz chiitaqui. Jakziltat ana walinacquiztan atipachhaja, jalla niiqui infiernuquin castictiquiztan liwriitaž cjequiča. Infiernuquin casticzqui curpumi animumi wiñaya sufriča. 'Pizc ticz' cjitača nii infiernuquin sufrisqui”.

PERGAMO ICLIZQUIZ CHIIITA TAKUNACA

¹²Pergamum icliz irpiñižquin tuž cijira: “Tsjiiqui porap kjuttan ar cuchillužtakaz žejlča. Jalla niiqui tuž cjiča: ¹³Wejrqui pajuča, tjapa ančucaž paatami. Jakziquin Satanás diabluqui mantičhaja, jalla nicju ančhuc žejlča. Jalla nižta žejlchiz

cjenami tirapanž wejtquíz tjurt'iñi kuzzizza. Wejtquin kuz tjaazqui ana jaytičha, ancha sufrichiž cjenami. Nii ancha sufris timpuquíz tsjiiqui ančhucaquíztan Antipas cjitaqui contataquičha. Antipasqui wejt puntuquíztan tisticu cjicanaqui zuma ticlarñičha, nižaza wejtquíz kuz tjaañipančha. Jakziquin Satanás diabluiq mantichaja, jalla nicju Antipas contataquičha. ¹⁴Nonžna; tsjii kjaž ujnaca ančucž quintr tjeeznučha. Yekjap ančhucaquíztan anawal tjaajintanaca catokchinčhucčha. Nii tjaajintanacaqui Balaamž cjita tjaajintažtakazza. Tuquita timpuqui nii Balaamqui Balak cjita žoñžquíz tjaajzičha, jaknužt Israel žoñinaca ujquíz tjojtskatchucažlaja, jalla nii. Nekztanaqui Balak cjitaqui Israel žoñinaca ujnacquíz tjojtskatchičha. Jaziqui Israel žoñinacaqui adulterio paachičha, nižaza žoñž paata yooznacquíz tjaata čhjeri lujlchičha. Jalla nižta ujnacquíz tjojtskatchičha Balak cjitaqui. ¹⁵Nižaza yekjap ančhucaquíztan nicolaítas tjaajintanaca catokchinčhucčha. Ninacž tjaajinta quintrajapa chjaawjkatučha. ¹⁶Ančhucaž anawali ujnaca paatiquíztan 'ujchizpantčha' cjis waquizičha; kuz campiiz waquizičha. Ujnacquíztan ana jaytaquíz niiqui, ančhucqui castictaž cjequičha. Wejrqui ančhucaquíz wajilla tjonačha, ujchiznacž quintr paazjapa. Wejt atquíztan ulanñi ar cuchillžtan ninacž quintr paa-ačha. ¹⁷Jakziltat nonžni cjuñchiz cječhaja, nonžla, Espiritu Santuž icliz žoñinacžquíz chiitaqui. Jakziltat anawalinacquíztan atipačhaja, jalla nižžquin ana pajta maná tjaa-ačha, lujljapa. Nižaza nižžquin tsjii chiw maz tjaa-ačha. Nižaza chiw mazquíz niž ew tjuu cijirtaž cjequičha. Nii ew

tjuuqui ana jakziltami zizza, nii tanzñi žoñikaz zizaquičha”.

TIATIRA ICLIZQUIZ CHIITA TAKUNACA

¹⁸Tiatira icliz irpiñžquin tuž cijira: “Tsjiiqui žejlčha, ujžtakaz c'ajñi čhjujccchiz, nižaza niž kjojchanacaqui jurnuquíz tjiñanta korižtakazza. Jalla niičha Yooz Majchqui. Niiqui tuž cjičha: ¹⁹Wejrqui ančhucaž paatanacami pajučha. Ančhucqui zuma munaziñi kuzzizza, nižaza wejtquíz tjapa kuztan criičha, nižaza wejtquíz tjapa kuztan sirwičha, nižaza pasinsis kuztan sufričha. Ančhucaž primir paata obranacquíztan ančhucaž anzata paata obranaca juc'ant zumačha. ²⁰Wejrqui cjiwčha, tii ujchizza ančhucqui. Tsjaa anawal maataka žejlčha, Jezabel cjiti maatakažtakaz. Naaqui cjiñčha, 'Wejrčha Yooz taku parliñtqui'. Jalla nuž cjican, wejtquíz sirwiñinacžquíz incallčha. Naaža incalltiquíztanacqui criichi žoñinacaqui adulteriuquíz ojklajčha; nižaza žoñž paata yooznacquíz tjaata čhjerinaca lujlčha. Jalla nuž ana zuma tjaajnan, ančhucqui naaža puntuquíztan ana kjaž cjiñchucčha. Pero nii anawal tjaajintaž quintr chiiz waquizičha. ²¹Wejrqui pasinsis kuz tjewzinčha, naaqui 'ujchizpantčha' cjican ujnacquíztan jaytizjapa. Pero naaqui uj paaznacquíztan anapan jaytiz pecčha; uj paaz pecčha. ²²Jalla nižtiquíztan naa sufriskatačha. Nižaza jakziltat naatan chica wejt quintr ujnaca paačhaja, jalla ninacazakaz ancha sufriskatačha. Naaža tjaajinta anawalinaca paazquíztan ana jaytaquíz niiqui, panž sufriskataž cjequičha. ²³Naa irat ana zum kamañchiz žoñinaca conačha. Jalla nekztan tjapa iclizanacquíz žejlñi

žoñinacaqui naaznaquiĉha, wejrqui ĉjul žoñiž kuzquiz pinsitami zizuĉha. Nižaza paata obranacquiztan jama zapa maynižquiz zumanacal tjaa-aĉha. ²⁴⁻²⁵Parti anĉhuc Tiatir criichinacaqui naaža tjaajinta ana catokchinĉhucĉha. Satanás diabluz ĉjojzaka tjaajintanaca ana mitisñi ĉjissinĉhucĉha. Anĉhucacquiz tuž ĉjiwĉha, jaknužt anĉhucqui wejt tjaajintanaca catokĉhaja, jalla nižta tirapan catokaquiĉha, wejr tjonzcama. Ana iya mantuĉha. ²⁶Jakziltat anawalinacquiztan atipĉhaja, nižaza tii muntu tucuzinzcama wejt munañpi jarupanž kamĉhaja, jalla niižquiz wejrqui mantiz poder tjaaĉha nacionanacĉhiz žoñinacĉquiz mantizjapa. ²⁷Jaknužt wejt Yooz Ejpqui mantiz poder wejtquiz tjaatĉhaja, jalla nižta irata wejrqui mantiz poder ninacĉquiz tjaa-aĉha. Jalla nižtiquiztan ninacaqui anawali paañi žoñinacĉquiz zuma c'aripacha mantaquiĉha, tsjii ljoc mazca t'unapacha kjolsnas, jalla nižta. ²⁸Nižaza wejrqui ninacĉquiz zumanacal tjaa-aĉha wenzta chawc warawaražtakaz. ²⁹Jakziltat nonžni ĉjuñĉizlaja, jalla niiqui nonžla, Espiritu Santuž icliz žoñinacĉquiz ĉhiitaqui”.

SARDIS ICLIZQUIN CHIITA TAKUNACA

3 ¹Sardis icliz irpiñižquin tuž ĉjijra: “Tsjižta pakallawk Yooz ispiritunaca žejlĉha, nižaza pakallawk warawaranaca žejlĉha. Jalla niiqui tuž ĉjiĉha: Anĉhucadž paata obranaca pajuĉha. Žoñinacaqui anĉhuc punctuiztan ĉjiñiĉha, ‘Zuma kamañchizza’ ĉjiñiĉha. Jalla nuž ĉhiichiž ĉjenami, ultimu ana zum kamañchizza; ticzižtakazza anĉhucqui. ²Anĉhucqui ana zuma

kamañanaca eca. Zuma kamañquiz tjurt'iñi kuzziz ĉjee. Tira anawali kamañĉizlaj niiqui, castictaž ĉjequiĉha. Wejrqui anĉhuc paata obranaca yatisinzinĉha, Yooz yujcquiz anawaliĉha, nii. ³Cjuñzna anĉhucqui, tuqui catokta tjaajintanacami, nižaza nonztanacami panž catoka. Jaziqui nii jaru wilta zumapan kama; nižaza anĉhuc ujnaca paaznacquiztan jayta, ‘ujĉhizpantĉha’, ĉjican. Anĉhucqui ana zuma kamañquiztan ana ecaquiž niiqui, castictaž ĉjequiĉha. Wejrqui tiripintit tjonaĉha, tsjii tjañižtakaz. Ana pinsita orquiz tjonaĉha, anĉhuc casticĉjapa. ⁴Tsjii kjaž anĉhuc Sardis žoñinacaqui zuma kamañchizza. Anĉhucĉha zuma ana ĉh'izlli zquitchiztakazqui. Jalla nižtiquiztan anĉhuc zuma žoñinacaqui wejttañ ĉhicaž juc'ant zuma kamaquiĉha zuma ĉhiw limpu zquitchiztakaz. Jalla nuž waquiziĉha anĉhucaltaqui. ⁵Jakziltat anawalinacquiztan atipaĉhaja, jalla ninacaqui zuma kamañĉiz ĉjequiĉha zuma ĉhiw limpu zquitchiztakaz. Nižaza ninacž tjuunaca anal akznaĉha žejtñi žoñinacž tjuu apuntita liwruquiztan. Nižaza wejt Yooz Ejpž yujcquiz, nižaza Yooz anjilanacž yujcquiz ninacž puntuiztan ticlaraĉha, ‘Wejt partiquizza tinacaqui’ ĉjicanaqui. ⁶Jakziltažlaja nonžni ĉjuñĉiz, nonžla, Espiritu Santuž icliz žoñinacĉquiz ĉhiitaqui”.

FILADELFIA ICLIZQUIZ CHIITA TAKUNACA

⁷Filadelfia icliz irpiñižquin ĉjijra: “Tsjiĉha juc'ant zumaqui; nižaza ligitumaĉha. Niĉha David jilirž mantiz poderĉizqui. Nii žoñiqui Yooz partiquiz luzkatasadž niiqui, anaž jecmi nii žoñiž luztiquiz atajasaĉha. Nižaza Yooz partiquiz ana luzkatasadž niiqui,

anaž jecmi luzkatasacha. Jalla niiqui tuž cjičha. ⁸Wejrqui ančhucaž paata obranaca pajučha. Ančhucaltajapa trabajo tjaachinčha wejtta langzjapa. Anaž jecmi ančhuc atajasačha. Ančhucqui ana suti azzizza. Jalla nuž ana zuti azziz cjenami, ančhucqui wejt taku tirapanž catokchinčhucčha, nižaza ančhucqui wejt puntuquiztan ana k'otchinčhucčha, 'Jesucristo anal pajučha' cjicanaqui. ⁹Nonžna. Yekjap žoñinacaqui cjiñičha, 'Wejrnačha Yooztajapa judío žoñinacaqui'. Jalla nuž chiican, k'otčha. Ultimu ana Yooztajapačha nii žoñinacaqui. Pero Satanás diabluz partiquiz kamñi žoñinacačha. Nonžna. Wejrqui ančhuca yujcquiz ninaca quillskatačha, ančhucaquiz rispitzjapa. Nižaza wejrqui ninaca zizkatačha, ančhucatan wejtta zuma munaziz, jalla nii. ¹⁰Wejt mantita ortin jaru kamcan, ančhucqui pasinsis kuztan sufrichinčhucčha. Jalla nižtiquiztan wejrqui ančhuc liwriyačha juc'ant sufris timpuquiztanaqui. Nii timpuqui tjonaquičha. Nekztan tjapa tii muntuquiz željñi žoñinacaqui ancha sufraquičha, wawčta cjisjapa. Jalla nii sufris timpuquiztan ančhuc liwriyačha. ¹¹Nižaza wejrqui wajillal tjonačha. Yooz tjajaintanaca tirapan catokaquičha. Nekztan Yoozqui ančhucaquiz zumanaca tjaaquičha, tsjii zuma premiužtakaz. Ančhucqui ana jec žoñžquizimi tsjii kjutñi irpiskataquičha nii zumanaca ana pertisnajo. ¹²Jakziltat anawalinacquižtan atipačhaja, jalla nižquiz uchačha Yooz kjuyquiz jilirižtakaz. Nižaza nii žoñinacaqui Yooz kjuychizpan cjequičha. Wejt Yooz Ejpž tjuu nižquiz cjižžinačha, Yooz kjuychiz žoñipan tjeezjapa. Nižaza wejt Yooz Ejpž wajtž tjuu nižquiz cjižžinačha. Wejt Yooz Ejpž wajtž tjuuqui ew Jerusalén

cjičha. Yoozqui arajpachquiztan nii watja chjijunžcaquičha. Nižaza wejt ew tjuu nižquiz cjižžinačha, wejt jila cjican. ¹³Jakziltažlaj nonžñi cjuñchiz niiqui, nonžla, Espiritu Santuž icliz žoñinacžquiz chiitaqui”.

LAODICEA ICLIZQUIN CHIITA TAKUNACA

¹⁴Laodicea icliz irpiñižquin tuž cjižra: “Tsjičha juc'ant lititumaqui. Jalla niiqui zuma razunžtanpan litituma chiičha Yooz puntu. Primirquiztanpacha niž cjen tjapa Yooz paatanaca paatatačha. Jalla niiqui tuž cjičha: ¹⁵Wejrqui ančhucaž paata obranaca pajučha. Ančhucqui ana ancha wejt quintr paachinčhucčha, nižaza ana ancha wejtajapa paachinčhucčha. Wejrqui pecučha, ančhucqui ancha wejt quintr paazjapa, už ancha wejtajapa paazjapa, jalla nuž pecučha. ¹⁶Jaziqui ana zumačha ančhuca kamzqui. Jalla nižta kamtiquiztan ančhuc chjatkatasacha, tsjii ana zuma jottažokaz. ¹⁷Ančhucqui cjiñchucčha, 'Ricachutčha wejrnaqui. Jaziqui walikal želučha, ana čjulumi pecučha'. Jalla nuž cjiñchucčha. Jalla nuž chiichiz cjenami ančhucqui ana naazinčhucčha, t'akjirižtakaz ančhucqui, nižaza porižtakaz, zur žoñinacažtakaz, nižaza ana zquitchiz žoñinacžtakazza. Ultimu nižta kamañchizza ančhucqui. ¹⁸Jalla nižtiquiztan wejrqui ančhucaquiz chiižinučha, wejtquiz kuzziz cjeajajo. Ujquiz tjiñanta korižtakaz jalla nižta c'achja kamaña ančhucqui wejtquiztan mayz waquizičha, ultim ricachu cjisjapa. Nižaza chiw zquitinacažtakaz jalla nižta zuma kamaña wejtquiztan mayz waquizičha, ančhuca azzuca ujnaca ana cherta cjisjapa. Nižaza čhjuj kullažtakaz wejtquiztan mayz waquizičha, ančhuca ujnacquižtan

čhetinta cjisjapa, nižaza ančhuc Yooz puntu intintini cjisjapa. ¹⁹Jakziltižtan wejrqui zuma munazičhaja, jalla niizquiz chiižinača. Nižaza zuma ewjt'uča, niiz kamaña azquichta cjeয়ো. Jalla nižtiquiztan weriž chiižintiquiztan, ančhucqui 'ujchizpantča' cjis waquiziča. Nižaza wejtquiz tjapa kuztan cjis waquiziča. ²⁰Nonžna. Wejrqui ančhuca kuzquiz macjatžcu, kjawznuča. Jakziltat weriž kjawža nonžaja, nižaza cazaja, jalla ninacž kuzquiz luzasača, nižaza ninacžtan chica zuma cjeeča. Nižaza ninacaqui wejttan chica zuma cjequiča. ²¹Jakziltat anawalinacquiztan atipačhaja, jalla niizquiz zuma honora tjaa-ača, wejttan chica mantiñi cjisjapa. Jaknužt wejrqui tjapa anawalinacquiztan atipžcu, wejt Yooz Ejpžtan chica mantiñi cjissaja, jalla nižta ninacaqui wejttan chica mantiñi cjequiča. ²²Jakziltažlaja nonžni cjuñchiz, jalla niiqui nonžla, Espiritu Santuž icliz žoninacžquiz chiitaqui”.

ARAJPACHQUIN CHERTANACA

4 ¹Jalla nekztanaqui wejrqui tsewc kjutni cherchinča. Arajpachquin tsjii zana cjetzi, cherchinča. Nižaza tsjii jora nonzinča, trompet pekz joražtakaz. Jaknužt primero nonžta jora, jalla nižta irata. Nii joraqui wejtquiz paljaychiča, tuž cjican:
—Tekz tjonžca. Wejrqui amquiz tjeeznača, jaknužt nekztan watačhaja, jalla nii.

²Nii orapacha wejrqui Espiritu Santuž mantiz poderquiz želatuča. Jalla nuž željcan, arajpachquin tsjii chawc mantiz julz cherchinča. Nižaza nii julzquiz tsjii julzi želatča. ³Nii julzi željni žoničača c'achja tsijtchiz, c'achja maznacažtakaz c'ajatča, jaspe

cornalina nižta maznacažtakaz. Nižaza niiz mantiz julz muytata cumari arco iris cherchinča, esmeralda maztakaz c'ajatča. ⁴Jalla nii chawc mantiz julz muytata paatunc pusin mantiz puestunaca cherchinča, zapa puestuquiz tsjii žoni julzi želatča. Nižaza ninacatača chiw tol zquiti cutchi; nižaza ninacž achquiz kor pillužtakaz tewžinta. ⁵Nii chawc mantiz julzquiztan liwjlwjnižtakaz ulanchiča, nižaza nii julzquiztan rayu jorjornižtakaz joranaca nonzinča. Nii chawc mantiz julz yujcquiz pakallak ujni teyasnacaqui pakallak Yooz ispiritunacača. ⁶Nižaza nii chawc mantiz julz yujcquiz kota želatča, ispijužtakaz c'ajatča.

Nižaza nii chawc mantiz julz muytata pajkpic latuquiztan pajkpic žejtninaca želatča. Jalla nii žejtninacaqui yujcquiztan tajquiztan tama čhujcquinacchiztača.

⁷Nii primir žejtniqui león animalažtakaztača. Tsjii žejtnižti wac turužtakaztača. Tsjii žejtnižti žonž yujcchiztača. Tsjii žejtnižti layni aquilažtakaztača. ⁸Nii pajkpic žejtninacaqui zapa mayni sojta wežlaž kjaražtakaztača, nižaza tjapa kjuttan čhujcquinacchiztača. Majiñami weenami tirapan Yooz wirzu tuž itscan želatča:

“Juc'ant zuma, juc'ant zuma,
juc'ant zuma, Jalla nižtapanča
tjapa azziz Yooz Jiliriqui. Yooz
Jiliriqui tuqitanami, anzimi,
jaztanami željča”.

Jalla nuž itsiča.

⁹Nii žejtninacaqui chawc mantiz julzquiz julzta mantiñižquiz honora tjaačiča, nižaza niizquiz rispitchiča, nižaza niizquiz gracias tjaačiča. Wiñayjapača nii chawc

mantiniqui. ¹⁰Chjulatorat žejtñinacaqui niža paatčhaja, nekztan nii paatunc pusin jilirinacaqui mantiñiž yujcquiz quillzičha, nižaza niižquiz rispitchičha. Nii chawc mantiz julžñiqui wiñayjapa wiñayačha. Jalla niiž yujcquiz nii tuncapan pusin jilirinacaqui ninacž kor pillužtakaz nonžinchičha, tuž itsñi cjican:

¹¹“Učhum Yooz Jiliri, amqui honorchizkaj cjila. Nižaza amqui rispittaj cjila. Nižaza amčha tjapa azzizqui. Jalla nii pajtaj cjila. Amqui tjapa žejlñinaca paachamčha. Amiž munaña jaru tjapa žejlñinacaqui paatačha, nižaza žejlčha”.

TJUUŽTA LIWRU CJETÑIQUI

5 ¹Nižaza nii julzi žejlñi mantiñiž žew kjarquiz tsjii liwru tjuužta želatčha. Nii tjuužta liwruqui porap latu cjijrztatačha. Nižaza nii liwruqui pakallak estampillžtan zcatžtatačha. Jalla nuž cherchinčha. ²Nekztanaqui cherchinčha, tsjii walja azziz anjila. Jalla nii anjilaqui altu joržtan pewcwnatčha, tuž cjican:
—¿Jequit waquizas tii tjuužta liwru cjetzjapa? ¿Nižaza tii zcatžta estampillanaca wjajrznas? —Jalla nuž pewcwnatčha.

³Arajpachquinami tii muntuquizimi, tii muntu koztanami anaž jecmi cjetz waquizičha, nii liwruquiz cjijrtanaca chertzjapa. ⁴Jalla nuž cjetz waquiziñi ana žejlchiz cjen, wejrqui kaacan ancha llaquizatučha. ⁵Jalla nekztanaqui tsjii jiliriqui wejtquiz paljaychičha, tuž cjican:

—Ana iya kaa. Tsjiiqui nii tjuužta liwru cjetñi waquizičha. Niiqui Judá cjita žoñiž majchmaatiquiztan tjonñičha. Juc'ant azziz cjen, León cjitačha. Nižaza niiqui Davidž

majchmaatiquiztan tjonñičha. Jalla niiqui tjappacha atipchiž cjen nii liwru cjetz waquizičha, nižaza nii liwruž estampillanaca wjajrñi.

⁶Nekztanaqui tižtanaca cherchinčha. Nii chawc mantiz julžtan, nii žejtñinacžtan, nii jilirinacžtan, jalla ninacž taypiqueiz tsjii Uuzažtakaz tsijtchi cherchinčha. Wilana jawkta Uuzažtakaz, jalla nii cherchinčha. Nižaza nii Uuzaqui pakallak wajranacchiztačha, nižaza pakallak čhjucquinacchiztačha. Niiž pakallak čhjucquinacaqui pakallak Yooz ispiritunacčha. Jalla nii Yooz ispiritunacaqui tjapa kjutñi tii muntuquiz cuchantačha. ⁷Jalla nii Uuzaqui tjuužta liwru tanzičha, julzi mantiñiž žew kjarquiztan. ⁸Nii liwru tanžtan nii pajkpic žejtñinacami nižaza nii paatunc pusin jilirinacami nii Uuzažtakaz chawc jilirž yujcquiz quillzičha. Zapa mayni nii jilirinacaqui pajk guitaražtakaz arpa cjita tanzitačha. Nižaza kor chuwanaca chjichatčha insinsuchiz chjijpi. Nii insinsuchiz chuwanacaqui Yoozquin criichinacž oracionanaca cjetčha. ⁹Ninacaqui ew wirsu itsatčha, tuž cjican:

“Amqui waquizichamčha nii tjuužta liwru cjetñijapa, nižaza nii liwruquiz zcatžta estampilla wjajrñijapa. Amqui contatačha. Ticziž cjen am ljokžtan Yooztajapa sirwiñi žoñinaca liwriichamčha. Amiž liwriita žoñinacačha tjapa zarchiz žoñinacami, nižaza tjapaman takunacchiz žoñinacami, nižaza tjapaman watjanacchizimi, nižaza tjapaman nacionanacchizimi.

¹⁰Amqui amiž liwriita žoñinaca mantiñijapa utchamčha. Nižaza amqui nii žoñinaca Yooztajapa

sirwiñijapa utchamčha, Amiž
liwriita žoñinacaqui tii yokquiz
mantaquičha”.

Jalla nuž cjichičha nii itsñinacaqui.

¹¹ Jalla nekztanaqui nonzinčha wacchi
anjilanacž jora. Nižaza cherchinčha
mantiz julz muytata, nižaza žejtñinacž
muytata, nižaza jilirinacž muytata,
jalla ninacž muytata muzpa waranka
waranka waranka anjilanaca želatčha.

¹² Nii anjilanacaqui altu joržtan cjichičha:

“Nii conta Uuzaqui waquizičha,
mantiz poder tanzjapa, nižaza
tjapa zuma cusasanaca tanzjapa,
nižaza tjapa zizjapa, nižaza
tjapa azziz cjisjapa. Nižaza nii
waquizičha honora tanzjapa,
nižaza rispitta cjisjapa, nižaza
honora waytižinta cjisjapa. Jalla
nužoj cjila. Nuž waquizičha nii
conta Uuzaqui”.

¹³ Nekztan tjapa arajpachquin
žejlñinacžtan, nižaza tjapa tii
muntuquiz žejlñinacžtan, nižaza tjapa
tii yok koztan žejlñinacžtan, nižaza
tjapa kotquiz žejlñinacžtan, jalla nuž
tjappacha niž puntu cjichičha:

“Nii chawc mantiñižquizimi
nii Uuzižquizimi wiñayjapa
honora waytižintaj cjila; nižaza
nii pucultižquiz wiñayjapa
honorchiz cjila; nižaza
wiñayjapa rispittaj cjila; nižaza
tjapa azziz cjila watay wata”.

¹⁴ Nekztan nii pajkpic žejtñinacaqui
cjetčha:

—Jalla nužoj cjila. Amén.

Nižaza nii paatunc pusin
jilirinacaqui quillžcu nii watay wata
žejtñižquiz rispitchičha.

ESTAMPILLANACA WJAJRTA CHERCHINČHA

6

¹ Nekztanaqui wejrqui
cherchinčha, jalla tužu:

Uuzažtakaz žoñiqui tsjii estampilla
wjajrzičha. Nižaza nonzinčha tsjii
žejtñiqui jorjorñižtakaz joržtan
kjawchičha:

—Pichay. Cheržca.

² Nekztan wejrqui cherchinčha, jalla
tužu: Tsjii chiw cawallu tjonchičha. Nii
cawallž juntuñ yawchi žoñiqui flech
arcu armichiz tanchičha. Niižquiz
tsjii atipz poder tjaatačha, tsjii
coronažtakaz. Jalla nižtiquiztan atipñi
ulanchičha, tirapan atipzjapa.

³ Nekztanaqui nii Uuzažtakazqui
segunda estampilla wjajrzičha. Jalla
nuž wjajrtan, segundo žejtñiqui
cjichičha:

—Pichay. Cheržca.

⁴ Nekztan yekja cawalluqui
ulanchičha, ljok cawallu. Nii cawallž
juñtun yawchi žoñiqui poder tjaatačha,
žoñinacpora kichanasjapa, nižaza
porapat conasjapa. Niižquiz tsjii pajk
cuchillu tjaatačha.

⁵ Nekztanaqui nii Uuzažtakazqui
tercer estampilla wjajrzičha. Jalla nuž
wjajrtan, nonzinčha tercer žejtñiqui tuž
cjican:

—Pichay. Cheržca.

Nekztan cherchinčha tsok cawallu.
Nižaza nii cawallž juñtun yawchi
žoñiqui balancichiztačha niž kjarquiz.
⁶ Nekztanaqui žejtñinacž taypiz
tsjii jora nonzinčha. Nii joraqui tuž
cjichičha:

—Pajk paaztan tsjii kilo trigo
kjayasačha. Nižaza pajk paaztan
čhjep kilo siwatu kjayasačha. Aceitimi
vinumi tira želaquičha.

⁷ Nekztanaqui nii Uuzažtakazqui
cuarto estampilla wjajrzičha. Jalla nuž
wjajrtan nonzinčha cuarto žejtñiqui tuž
cjican:

—Pichay. Cheržca.

⁸ Jalla nekztanaqui wejrqui
cherchinčha, tsjii k'll cawallu želatčha,

yawchi žoñchiz. Jalla nii yawchi žoñiqui Ticz cjitatacha. Niiž wiruñ Ticz Yoka cjita apziča. Ninacžquiz poder tjaatacha, cuarta parte tii muntuquiz žejlñi žoñinaca conzjapa. Ninacaqui žoñinaca conaquiča pajk cuchillžtan, mach'anacžtan, conanacžtan, nižaza anawal animalanacžtan.

⁹Jalla nekztanaqui nii Uuzažtakazqui quinta estampilla wjajrziča. Jalla nuž wjajrtan wejrqui cherčinča arajpach altarž koztan almanaca želatča. Nii almanacž curpunacaqui Yooz taku parlitiquiztan contatača. Ninacaqui tii muntuquiz kamcan Yooz puntu ticlarchiča. Jalla nižtiquiztan contatača. ¹⁰Nii almanacaqui altu joržtan kjawcan tuž cjichiča:

—Zuma lijitum Jiliri. Ampanča taku cumpliñiqui. Jaziqui ččhjulorcamat žoñinaca pjalznaquiya? Ččhjulorcamat wejrnac conñi žoñinaca casticaquiya? —Jalla nuž cjichiča nii almanacaqui.

¹¹Jalla nekztanaqui almanacaqui chiw tol zquiti tjaatača. Nižaza ninacžquiz cjitača, tsjii kjaž tjuñikaz jeejznaquiča. Primiruqui iya Cristužquiz sirwiñinacaqui conta cjistanča, jaknužt tuquiqui almanacž curpunaca contažlaja, jalla nižta. Nii containaca pjojkzcama, almanacaqui jeejznaquiča.

¹²Jalla nekztanaqui nii Uuzažtakazqui sexta estampilla wjajrziča. Jalla nuž wjajrtan, wejrqui cherčinča, yoka ancha chekjinskatatča. Nižaza tjuñimi tsokchi cjissiča, lut zquitižtakaz. Nižaza jiizmi ljok cjissiča. ¹³Nižaza warawaranacami yokquin tjojtsquichiča, jaknužt pjursant tjamiqui higo frutanaca tjojtskatčhaja, jalla nižta. ¹⁴Nekztanaqui pachaqui katchiča tjuužta papilažtakaz. Nižaza

tii muntuquiz tjapa curunacami tjapa kot taypiquiz žejlñi yokanacami kizkattatača. ¹⁵Nekztanaqui tii muntuquiz mantiñinacami, jilirinacami, zultatž jilirinacami, ricachunacami, azziz žoñinacami, mantita žoñinacami, ana mantita žoñinacami, tjappacha chjojziča pajk maz pjetanacquizimi, nižaza cur akjinacquizimi. ¹⁶Jalla ninacaqui kjawchiča, tuž cjican:

—Curunaca, maznaca, wejtnaca juntuñ tjojtžca. Wejrnac chjojzna, julzi mantiñiž yujcquiztan. Nižaza wejrnac chjojzna nii žawjchi Uuzažtakazquiztan, ana castica cjisjapa.

¹⁷Ultim casticz tjuñi tjonča. ¿Ject Yoozquiztan atipas? —Jalla nuž kjawchiča ninacaqui.

144,000 ŽOÑINACA CHIMPUTA

7 ¹Jalla nekztanaqui wejrqui cherčinča, pajkpic anjilanacaqui tii muntuž pajkpic latuquiztan tsijtsi želatča. Jalla nuž žejlcan pajkpic puntu tjaminacaqui atajatča, ana zinta tjamzjapa yokquizimi kotquizimi muntinacquizimi. ²Nekztanaqui tsjii anjila cherčinča, tuwanchuctan tjonñi. Nii anjilaqui žejtñi Yooz mantita ortinžtan tjonchiča. Jalla nižtiquiztan nii anjilaqui altu joržtan kjawcan paljaychiča pajkpic anjilanacžquiz. Nii pajkpic anjilanacaqui poder tjaatača, yokami kotami anawali cjiskatzjapa. ³Jalla nižtiquiztan nii Yooz tjaata ortinžtan anjilaqui ninacžquiz cjichiča:

—Yokami, kotami, muntinacami ana anawali cjiskata, učhum Yooz sirwiñinaca chimputa cjiscama. Yooz sirwiñinacaqui ninacž yujc ayquiz chimputa cjequiča.

⁴Nekztanaqui nonzinča patac pusi tuncan pusin waranka

žoŋinaca chimputataĉha, tjapa Israelž familianacquiztan. ⁵Tuncapan waranka Judáž familiaquiztan chimputataĉha. Tuncapan waranka Rubénž familiaquiztan chimputataĉha. Tuncapan waranka Gadž familiaquiztan chimputataĉha. ⁶Tuncapan waranka Aserž familiaquiztan chimputataĉha. Tuncapan waranka Neftalíž familiaquiztan chimputataĉha. Tuncapan waranka Manasés familiaquiztan chimputataĉha. ⁷Tuncapan waranka Simeónž familiaquiztan chimputataĉha. Tuncapan waranka Levíž familiaquiztan chimputataĉha. Tuncapan waranka Isacarž familiaquiztan chimputataĉha. ⁸Tuncapan waranka Zabulónž familiaquiztan chimputataĉha. Tuncapan waranka Joséž familiaquiztan chimputataĉha. Tuncapan waranka Benjamínž familiaquiztan chimputataĉha.

CHIW ZQUITCHIZ ŽOŇINACA

⁹Jalla nektzanaqui cherchinĉha, muzpa tama žoŋinacaqui chawc mantiz puesto yujcquizimi, nažaza Uuzažtakaz žoŋž yujcquizimi želatĉha. Nii žoŋinacaqui tjapa nacionanacquiztantaĉha, nižaza tjapaman zarchiz žoŋinacžquiztantaĉha, nižaza tjapaman watjanacquiztantaĉha, nižaza tjapaman takunacchiz žoŋinacžquiztantaĉha. Muzpa tamataĉha, jalla nižtiquiztan ana wira kanchucataĉha. Jalla nii žoŋinacaqui chiw tol zquti cutchicamataĉha. Nižaza ninacž kjarquiz munti itzanaca tanziĉha, ĉhjanžtanpacha. ¹⁰Jalla nii žoŋinacaqui altu joržtan tuž chiyatĉha: “Uĉhum Yoozkazza Liwriiŋiqui. Niiĉha chawc mantiz puestuquiz

julžŋiqui. Nižaza nii Uuzažtakaz žoŋžakazza Liwriiŋiqui”.

¹¹Nižaza chawc mantiz puestu muytatami, jilirnacž muytatami, pajkpic žejtŋinacž muytatami, jalla ninacž muytata tjapa anjilanacaqui tsijtchi želatĉha. Ninaca zakaz chawc mantiz puestuž yujcquiz yokquiz puct'ichi Yooz rispitaĉha. ¹²Nii anjilanacaqui Yooz rispitan tuž cjichiĉha:

“Jalla nužoj cjila. Uĉhum Yooztajapa watay wata honora waytižintaj cjila, nižaza wiŋaya rispittaj cjila. Uĉhum Yoozza zizŋi zizŋipanqui. Niižquiz wiŋaya gracias cjila. Nižaza niižquiz honora waytižintaj cjila. Uĉhum Yoozqui wiŋayjapa tjapa azziz cjila, nizaza poderchiz. Jalla nužoj cjila. Amén”.

¹³Jalla nektzanaqui tsjii jiliriŋiqui wejr pewcziĉha, tuž cjican:

—¿Jecnacat tii chiw zquti cujtchinacaya? Nižaza ĉjakziquiztan tjonchi ninacataya?

¹⁴Wejrqui niižquiz kjaazinĉha, tuž cjican:

—Jiliri, anal zizuĉha.

Nektzan niiŋi cjichiĉha:

—Tinacaqui juc'ant sufris timpu watchiĉha. Nižaza tinacaqui ujnacquiztan liwriitaĉha, Jesucristo Uuzažtakaz cjen. Cristuž ticiz cjen, jalla nižtiquiztan tinacaqui chiw ajunta zquitichizza. ¹⁵Jalla nižtiquiztan tinacaqui Yooz mantiz puestu yujcquiz žejlĉha. Tinacaĉha majiŋami weenami Yooz kjuyquiz sirwiŋinacaqui. Nižaza nii chawc mantiz puestuquiz julžŋiqui tinaca cwitaquiĉha. Niižtan tinacžtan watay wata chica želaquiĉha. ¹⁶Tinacaqui ana iya ĉjeri eeskataquiĉha, nižaza anaž iya kjaz kjara pasnaquiĉha. Nižaza sii

kjakimi ana tinaca laacjiskataquiĉha, niĉaza ĉjul kjakimi. ¹⁷Jesucristuĉha mantiz puestu ĉcatipacha ĉejlĉiqui. Jalla nii Uuzaĉtakaz Jesucristuqui tinacĉ awatiri cjequiĉha. Niĉaza Jesucristuqui tinacĉquiz zuma kamaĉhizpan irpaquiĉha, jaknuĉt zuma awatiriqui niĉz uuzanaca zuma jalzurquiz kjaz liquiĉĉhaja, jalla niĉta. Niĉaza Yoozpacha tjapa tinacĉ kaaj ĉhj ujĉinaquiĉha.

SEPTIMA ESTAMPILLA WJAJRTA

8 ¹Jalla nekztanaqui Uuzaĉtakaz Cristuqui séptima estampilla wjajrĉiĉha. Jalla nuĉ wjajrtan, tsjii media ora tjapa ĉh'uju ĉejlĉiĉha arajpachquin. ²Nekztan cherĉinĉha, pakallawk anjilanaca ĉelatĉha. Nii anjilanacaqui Yooz yujcquiz tsjĉtĉiĉha. Jalla ninacĉquiz pakallawk trompet pekz tjaatataĉha. ³Nekztanaqui tsjii anjilaqui tjonĉcu, altar yujcquiz tsjĉtsiĉha, tsjii kor insinsarchiz. Jalla nekztanaqui niĉzquiz wacchi insinsunaca tjaatataĉha, criichinacĉ oracionanacĉtan t'ajzjapa. T'ajĉta insinsuĉtan oracionanacĉtan kor altarquiz nonĉtataĉha ĉhawc mantiz puestu yujcquiz. ⁴Nii Yooz anjilĉ kjarquiztan criichinacĉ oracionanacĉtan insinsuĉtan t'ajĉta ĉketi waytichiĉha Yooz yujcquiz. ⁵Jalla nekztanaqui nii anjilaqui insinsaru tanĉcu, altarquiz uj paraziĉtan ĉhjĉpziĉha. Nekztan nii uj paraziĉtan ĉhjĉpi insinsaru tii muntu yokquiz tjojtĉiĉha. Jalla niĉtiquiztan anĉha pjursanti liwjlĉiwĉiĉha, niĉaza anĉha pjursanti jorjorĉiĉha, niĉaza yoka ĉhekjinĉiĉha.

TROMPETCHIZ ANJILANACA

⁶Jalla nuĉ watĉcu pakallawk trompetchiz anjilanacaqui tjacĉiĉha trompetanaca tjawunzjapa.

⁷Primir anjilaqui niĉz trompet pekz tjawunchiĉha. Jalla nuĉ tjawunĉcu caranuz ĉhijĉiĉtan ujĉtan, niĉaza lĉokĉtan t'ajĉta tii muntu yokquiz cutzinĉiĉha. Jalla niĉtiquiztan tercer parti tii muntu yoka ujsiĉha, niĉaza tercer parti muntinaca ujsiĉha, niĉaza tercer parti pastunacami ujsiĉha.

⁸Nekztan segundo anjilaqui trompet pekz tjawunchiĉha. Jalla nuĉ tjawunĉcu uj peksi pajk curuĉtakaz pajk kotquin tjojtĉiĉha. Nekztanaqui tercer parti kot kjazqui lĉok ĉjissiĉha. ⁹Nekztan tercer parti kotquiz ĉejlĉi animalanacaqui ticziĉha, niĉaza tercer parti kotquiz ojklayĉi warcunacaqui akĉtataĉha.

¹⁰Tercer anjilaqui trompet peks tjawunchiĉha. Jalla nuĉ tjawunĉcu pajk warawara arajpachquiztan tjojtĉiĉha, uj peksi teyaĉtakaz. Nii warawaraqui tjojtĉiĉha tercer parti pujunacquizimi, niĉaza tercer parti tujnacquizimi niĉaza wiĉiĉnanacquizimi. ¹¹Nii warawaraĉ tjuuqui Ajenjo ĉjitaĉha. Ajenjo ĉjitaĉha tsjii jar muntiqui. Jalla nii warawaraĉ tjojtĉiquiztan tercer parti kjazqui ajenjoĉtakaz jaru ĉjissiĉha. Nii jar kjaz ĉjen walja ĉoĉinacaqui ticziĉha.

¹²Cuarto anjilaqui trompet pekz tjawunchiĉha. Jalla nii tjawunĉcu tercer parti tjuĉimi jiizmi warawarami zumchi ĉjissiĉha. Nekztanaqui tercer parti majiĉnaqui ana kĉanĉiĉha, niĉaza tercer parti weenami ana kĉanĉizakazza.

¹³Jalla nekztanaqui wejrqui cherĉinĉha, niĉaza nonzinĉha, tsjii anjilaqui tseewc arajpach taypĉiquiz laycan altu jorĉtan ĉhiĉiĉha, tuĉ ĉjican:

—Muntu yokquiz ĉejlĉi
ĉoĉinacĉtajapa ana wali, ana
wali, ana wali ĉjisnaquiĉha. ĉhjep

parti anjilanacaqui trompet pekz
tjawunzmayačha. Jalla ninacáž
tjawnan juc'ant ana wali cjisnaquičha.

QUINTO ANJILAQUI

9 ¹Jalla nekztanaqui
quinto anjilaqui trompet
pekz tjawunchičha. Jalla nuž
tjawuntiquiztan tsjii warawaražtakaz
cherchinčha arajpachquiztan tii
yokquiz tjojtsi. Jalla nii warawaražta
anawal jiliržquiz poder tjaatačha,
anawal koz tuj cjetzjapa. ²Jalla
nekztanaqui nii anawal jiliriqui koz tuj
cjetičha. Jalla nuž cjetžtiquiztan jurnu
žketižtakaz ulanchičha. Jalla nii koz
tuj žketiqui tjuñimi pachami zumchi
cjiskatchičha. ³Jalla nii žketquiztan
langosta animalanaca ulanchičha
tii yokquiz laylayzjapa. Jalla nii
animalañacžquiz anawali paazjapa
poder tjaatatačha, jaknužt tsjii
yek'achunca ana wali yek'antičhaja,
jalla nižta cjisjapa. ⁴Nižaza nii
animalanacaqui mantitatačha, anačha
yokquiz žejlñi pastunacžquizimi tjapa
ch'ojña pajkñinacžquizimi anawali
paajo. Pero yujc ayquiz ana Yooz
chimpata žoñinacžquiz ana wali
paasačha. ⁵Pjijska jiizcama nii anawali
paañi animalanacaqui ana chimpata
žoñinacžquiz sufriskatzjapa nižta
poder tjaatatačha. Sufriskatcanami
ticzkatta poder ana tjaatatačha. Jalla
nuž sufriskatan, nii žoñinacaqui
ancha ayinchičha, jaknužt tsjii žoñi
yek'antiquiztan ancha ayiñižlaja, jalla
nižta. ⁶Jalla nižta sufris timpuquiz
žoñinacaqui ticz pecaquičha, pero
anaž ticzñi ataquičha. Jalla nuž ticz
peccanami, ana wira ticz tjonaquičha.
⁷Nii langosta cjita animalanacaqui
quira tjacžta cawallunacažtakaztačha.
Ninacž achanacžquiz kor
pillunacchiztakaztačha. Nii

animalanacž yujcnacaqui žoñinacž
yujcnacažtakaztačha. ⁸Nižaza
ninacž charaqui maatakanacž
charažtakaztačha. Nižaza ninacž
ižkenacaqui león animalanacž
ižkenacažtakaztačha. ⁹Nižaza
ch'iztakaz kjajpchiztačha. Nii
kjajpanacaqui jiružtakaztačha
curpunaca chjojžjapa. Laylaycan, nii
animalanacaqui ančaž arnatčha,
jaknuž cawallunacaqui tsjii quirquiz
zalzan arančhaja, jalla nižta.
¹⁰Nii animalanacž kjurznacaqui
yek'achuncaž kjurztakaztačha. Ninacž
kjurznacžtan yek'antasačha žoñinaca
sufriskatzjapa nii pjijska jiiz intiru.
¹¹Nii animalanacž mantiñi jiliriqui
nii koz tuj cjetñipachačha. Nii jilirž
tjuuqui Abadón cjitačha hebreo
tawkquiziqui. Griego tawkquiz Apolión
cjitačha. Apolión cjičha, akzñiqui, nii.
¹²Jalla nižta watžcu primir
anawaliQUI watchičha. Nonžna. Imaziž
iya pizc anawalinacaqui tjončha.
¹³Jalla nekztanaqui sexto anjilaqui
trompet pekz tjawunchičha. Jalla nuž
tjawuntiquiztan tsjii jora nonzinčha.
Yooz yujcquiz žejlñi kor altarquiztan
nii joraQUI ulanchičha. Pajkpic
wajrichiztačha nii kor altaraQUI. ¹⁴Nii
joraQUI sexto trompetchiz anjilžquiz tuž
cjichičha:
—Pajk Eufrates cjita pujquiz pajkpic
anjilanaca čhejlta žejlčha. Jalla nii
pajkpic anjilanaca cutzna, —jalla nuž
cjetčha.
¹⁵Nekztanaqui nii pajkpic
anjilanacaqui cutstatačha, čhjep parti
žoñinaca conzjapa. Jalla nižta paazjapa
tjacžtatačha, nii ora, nii tjuñi, nii jiiz, nii
wata, jalla nii timpujapa nižta paazjapa
tjacžtatačha. ¹⁶Žoñinaca conzjapa
wacchi žoñiž yawchi cawallunaca
želatčha, paa patac millonanacatačha.
Jalla nuž wacchi nonzinčha.

¹⁷Nii cawallunacatacha jalla tižta cherchiqui. Nii yawchi žoñinacau queca weezinacchiztača. Nii queca weezinacau tižta culuranacatača, ljok, larama, k'illu, jalla nižta culuranacatača. Nii cawallunacau león animalanacž achanacchiztača. Jalla nii cawallunacž atquiztan uj, žketi, azupri ulanchiča. ¹⁸Jalla nii čhjep anawalinacatača anawali paachiqui. Jalla nii uj, žketi, azupri ulantiquiztan chjep parti žoñinaca contatača. ¹⁹Nii cawallunacž sufriskatz poderaqui ninacž atquiztača, nižaza ninacž kjurzquiztača. Nii cawallunacž kjurnacau zkorážtakaztača. Nii zkoranacau ch'atñi achchiztača, žoñinaca sufriskatzjapa.

²⁰Nii anawalinacaz ana conta žoñinacazti Yoozquin anapanž kuz tjaachiča. Žoñiž paata yooznacžquin rispitzquiztan anapan jaytichiča. Tirapan rispitchiča zajranacžquizimi nižaza žoñiž paata yooznacžquizimi. Ninacž yooznacau paatatača korquiztan, paazquiztan, mazquiztan, tabliquiztan, jalla nižtanaca. Nii žoñiž paata yooznacatača ana cherñimi, nižaza ana nonzñimi, nižaza ana ojklayñimi. ²¹Nii parti žoñinacau anawal kamtiquiztan anapan jaytichiča. Tirapantača žoñi conzqui, nižaza yat'iri ojklayzqui, nižaza adulteriuquiz ojklayzqui, nižaza tjañizaz ojklayzqui.

TSJII LIWRUCHIZ ANJILA ŽELATČHA

10 ¹Nekztanaqui pajk azziz anjila cherchinča, arajpachquiztan tjonñi. Nii anjilaqui tsjir taypiz tjonchiča, tsjii arcu iris cumari niž ach juntui. Nii anjilž yujcqui tjuñžtakaz c'ajatča. Lisnacaqui

uj asñižtakaztača. ²Niž kjarquiz tsjii cjetža liwru tanzicha. Niž žew kjojchaqui pajk kotquiz tjecziča, niž zkar kjojchaqui yokquiz tjecziča. ³Nii anjilaqui altu joržtan kjawchiča, león animalažtakaz. Nekztanaqui pakallawk wila jorjorchiča. ⁴Jalla nuž jorjortan, wejrqui cjiyrzmayatača. Pero cjiyrzmaya cjen arajpachquiztan tsjii joraqui wejtquin chiižquichiča, tuž cjan:

—Nii pakallawk jorjorñiž chiitaqui chjozna. Ana nii puntu cjiyra.

⁵Jalla nekztanaqui nii kotquizimi yokquizimi tjeczi anjilaqui žew kjara waytichiča arajpach kjutñi. ⁶Žew kjara waytižcu, juramintu paachiča Yooz tjuu chiican.

—Watay wata žejtñi Yoozqui paachiča arajpachami, yokami, kotami; nižaza arajpachquiz žejlñinacami, yokquiz žejlñinacami, kotquiz žejlñinacami, tjappacha paachiča. Jalla nii zinta Yooz tjuu chiican juramintu paachiča, tjapa Yooz puntu parliñi profetanacž chiiatanacau ana enenžcu cumplisjapa. ⁷Čhjulatorat séptimo anjilaqui trompet pekz tjawznačaja, jalla nii timpu Yooz chjozaka tantiita taku cumplisnaquiča. Tuqui timpuqui Yoozqui niž sirwiñi profetanacžquiz nii chjozaka taku mazinchiča.

⁸Jalla nekztanaqui nii arajpachquiztan chiižquini joraqui wila wejtquiz paljayžquichiča, tuž cjan:

Nii kotquizimi yokquizimi tjeczi anjilž kjarquiztan cjetta liwru tanzñi oka. Jalla nuž wejtquiz mantichiča.

⁹Jalla nekztanaqui anjilžquin liwru mayi ojkinča, wejtquiz nii liwru tjaajo. Nii anjilaqui wejtquiz cjichiča:

—Tanzna, nižaza lujzna. Am atquiz zuma mazk'až cjequiča. Pero am pjuchquiziqui jaruž tucaquiča.

¹⁰Nekztan anjilž kjarquiztan liwru tanžcu lujlzinča. Wejt atquiz ancha mazk'atača. Jalla nuž lujltiquiztan wejt pjuchquiz jaru cjissiča.

¹¹Nekztanaqui wejtquiz cjichiča:

—Wilta amqui Yooziž chiita taku paljaystanča, nacionanacž puntuquiztanami, tjapaman sarchiz žoñinacž puntuquiztanami, tjapaman takunachiz žoñinacž puntuquiztanami, mantiñinacž puntuquiztanami.

YOOZ TAKU PALJAYŇI ŽOÑINACA

11 ¹Jalla nekztanaqui wejtquiz tsjii caña tjaatatača tupz paražtakaz. Nekztanaqui tsjiiqui wejtquiz mantichiča tuž cjican:

—Žaazna. Yooz kjuya miriižca, altaržtanpacha. Nižaza neks žejlŋi Yooz rispitñinaca kanzna. ²Yooz kjuy patiuqui ana miriizaquiča. Jalla nii patiuqui yekja wajtchiz žoñinacžquin intirjitača. Jalla nii žoñinacaqui Yooz zuma watja akznaquiča pusi tunc paani jiiznaca. ³Wejrqui cuchanžcača pucultan tisticu wejtquiztan paljayajo. Lut zqiti cujtchi ojklayaquiča, 1260 tjuñicama. —Jalla nuž wejtquiz mantichiča.

⁴Pizc olivo cjita muntinacami, nižaza pizc cantilirunacami tii yok mantiñi Yooz yujcquiz žejlča. Jalla nii muntinacami, nižaza cantilirunacami pucultan tisticu cjiča. ⁵Jakziltat Yooz taku paljayŋi žoñinacžquiz sufriskatz yanznačhaja, jalla niiqui contaž cjequiča. Nii pucultan tisticunacž atquiztan asŋi uj ulnaquiča ninacž quintra žoñinaca liwj ujzjapa. Nekztan ninacžquiz sufriskatz pecñinacaqui contaž cjequiča. ⁶Poderchizza nii pucultan tisticunacaqui ana chijinskatajo. Yooz taku paljaycan, jalla nii timpu ana chijinskataquiča. Nižaza nii pucultan tisticunacaqui

kjaz ljok tuckatz poderchizzakazza. Nižaza tii yokquiz žejlŋi žoñinacžquiz tjapaman anawalinacžtan sufriskatz poderchizzakazza. Čhjulora peccanami žoñinaca sufriskatasacha. ⁷Jalla nii pucultan tisticunacaqui Yooz taku paljayz žeržcu, contaž cjequiča. Tsjii anawal animalažtakaz anawal koz tujquiztan ulnaquiča. Yooz taku paljayñinacž quintra cjequiča. Nižaza nii pucultiquiztan atipaquiča, nižaza conaquiča. ⁸Nekztanaqui ninacž ticzi curpunacaqui jakowasaquiča, Jerusalén wajt callquiz. Nii pajk wajtquiz Jesucristuqui cruzquiz ch'awctatača. Nižaza Jerusalén watjaqui Sodoma cjitača tsjii parabolažtakaz. Nižaza Egipto cjitazakazza, tsjii parabolažtakaz. ⁹Čhjep maj chicatchiz tisticunacž ticzi curpuqui callquiz želaquiča. Jalla nuž želan žoñinacaqui ticzi curpunaca cheraquiča, tjapa nacionanacchiz žoñinacami, tjapa watjanacchiz žoñinacami, tjapaman takunacchiz žoñinacami, tjapaman saranacchiz žoñinacami, jalla ninaca. Nii cherzŋi žoñinacaqui anaž nii ticzi curpunaca tjatkataquiča. ¹⁰Nii pucultan tisticunacaqui tii yokquiz žejlŋi žoñinacžquiz ancha sufriskatchitača. Jalla nuž ticžtiquiztan tii yokquiz žejlŋi anawal žoñinacaqui cuntintuž cjequiča, nižaza pijjzta paaquiča, nižaza porapat onantanaca onarassaquiča. ¹¹Nekztan čhjep maj chatquiztan Yoozqui nii pucultan tisticunaca jacatatskataquiča, wilta žeti tjaacan. Jacatatžcu tsijtsnaquiča. Nekztan nii ticziquiztan jacatatchinaca cheržcu, žoñinacaqui ancha tsuetsucaquiča. ¹²Jalla nekztanaqui arajpachquiztan tsjii altu joraqui nii pucultizquiz paljayaquiča, tuž cjican:

—Tsewc yawžca ančhucqui. Tekz želaquiča.

Jalla nektzanaqui quintrā
 žoñinacaž cheran, nii pucultan
 tisticunacaqui arajpachquin waytitaž
 cjequičha tsjir taypiquiz. ¹³Nekztan
 cherčinčha tužu. Jalla nii orapacha
 ancha yoka chekjinchičha. Jalla
 nuž yoka chekjintiquiztan tunca
 parti Jerusalén watjaqui pajlsičha.
 Nii yoka chekjintiquiztan pakallawk
 warank žoñinaca ticzičha. Parti žejtñi
 žoñinacazti ancha tsuctsucchičha. Jalla
 nižtanaca wattiquiztan parti eclichi
 žoñinacaqui Yooz honora waytichičha.

¹⁴Jalla nii anawali wattan, pizc
 anawalinacaqui watchičha. Nižaza
 wajillaž tjončha tercer anawaliqui.

SEPTIMO ANJILA

¹⁵Jalla nektzanaqui séptimo
 anjilaqui trompet pekz tjawunchičha.
 Jalla nuž tjawuntiquiztan arajpachquin
 altu joranaca chiiñi nonzinčha. Jalla
 tuž čiichičha:

“Tjapa tii muntuqui učhum Yooz
 Jiliriz mantita cjissičha. Nižaza
 Yooz Epiž uchta Jesucristuž
 mantita cjissičha. Jalla
 ninacačha watay wata wiñaya
 mantiñiqui”.

¹⁶Jalla nektzanaqui nii paa tunc pusin
 jilirinacaqui Yooz yujcquiz yokquiz
 puct'ican, Yooz rispitchičha. Jalla
 ninacačha Yooz yujcquiz mantiz
 puestunacquiz julzñiqui. ¹⁷Yooz
 rispitan, tuž cjichičha:

“Tjapa azziz Yooz Jiliri, amčha
 anzimi tuquitanami žejlñiqui.
 Am juc'ant azi tjeezamčha,
 nižaza anziqiu tjapa mantiñi
 kalltichamčha. Jalla
 nižtiquiztan amquin gracias
 tjaa-učha. ¹⁸Nacionanachiz
 žoñinacaqui am quintrā
 žawjchičha. Pero ninaca casticz
 tjuñi tjončha. Nižaza ticzi

žoñinaca pjalz tjuñi tjončha.
 Nižaza amquiz sirwiñinacžquiz
 zumanaca tjaaž tjuñi tjončha.
 Amquiz sirwiñinacami, am
 taku paljayñinacami, amquiz
 rispitiñinacami, amquiz kuz
 tjaañinacami, jalla tjapa
 ninacžquizimi zumanaca tjataž
 cjequičha pjalz tjuñquiziqui.
 Nižaza tii yoka akñinacami, tii
 yoka žejlñi žoñinaca akñinacami,
 jalla ninaca akskattaž cjequičha.
 Jalla nii tjuñiž tjončha”.

Nuž cjichičha nii paa tunc pusin
 jilirinacaqui.

¹⁹Jalla nektzanaqui Yooz arajpach
 kjuya cjetztatačha. Kjuy kjuytlan tsjii
 cajuna chertatačha. Yooziž tjaata
 takutačha nii cajunquiziqui. Nižaza
 arajpachquin rayunaca želatčha,
 nižaza jorjorñinaca želatčha. Nižaza
 yoka chekjinskatñi želatčha. Nižaza
 pjursanti caraniza želatčha.

TSJAA MAATAKATAN TSJII ANAWAL ANIMALŽTAN

12 ¹Jalla nektzanaqui
 arajpachquin tsjii pajk siñala
 parizichičha. Nii siñalaqui tižtatačha.
 Tsjaa maataka želatčha. Naa maataka
 zquitiqui tjuñižtakaztačha. Nižaza
 naaža kjojch koztan jiiz želatčha.
 Naaža achquiz tuncapan warawara
 tewžintatačha, tsjii pillužtakaz.
²Naa maatakqui icatačha. Nuž
 cjen, ancha aynatčha, majtzjapa.
³Jalla nektzanaqui tsjii siñala
 parizichizakazza arajpachquin. Tsjii
 juc'ant anawal pajk ljok animala
 želatčha. Jalla niqiu dragón cjitatačha.
 Pakallawk achchiztačha, nižaza
 tunca wajrichiztačha. Nižaza zapa
 achquiz mantiñi žoñž pillunacžtan
 tewžintatačha. ⁴Niiž pajk kjurž
 wewczcu, čjep parti warawaranaca

tjojtskatchiĉha yokquin. Jalla nii dragonqui maataka yujquiz tsijtsiĉha, naa maataka majtz ora tjewĉcan.

Jalla nuĉ tsijtsiĉha, naaĉa majtta wawa lujljzjapa majttiquiztanpacha.

⁵Nekztanaqui naa maataqui lucmajch wawa majtchinĉha. Nii lucmajchqui tjapa nacionquiz ĵejlĉni ŝoĉinaca c'aripacha mantiĉiĉ cjequiĉha. Pero jalla nuĉ majttiquiztan nii lucmajch wawaqui Yoozquin waytitataĉha, Yooziĉ tjaata puestunaca tanzjapa. ⁶Naa maataktzi ch'ekti yokquin atipassinĉha. Jalla nicju Yoozqui naa maatakaltaĉjapa tsjii yoka tjaczinĉiĉha. Jalla nicju 1260 tjuĉinaca watzcama ĉherĉiz cjequiĉha naaqui.

⁷Jalla nekztanaqui arajpachquin quira zaltissiĉha, Miguelĉtan niiĉ mazi anĉilanacĉtan dragonĉ quintra quira zaltissiĉha. Nii dragonĉtan niiĉ mazinacĉtan ancha kichjassiĉha. ⁸Pero atipta cjissiĉha. Jalla niĉtquiztan arajpachquin ana iya ŝelasaĉha.

⁹Jalla niĉtquiztan nii dragonĉtan niiĉ mazi anĉilanacĉtan tii yokquiz ĉjatkatzquitataĉha. Nii dragonqui Satanĉs diablupantaĉha. Niiĉa tuquita ŝkoraĉtakaz incallĉiqui. Tuquitan nii diabluqui Evaquiz incalltquiztan tjapa tii muntu incallĉiĉha anawali cjiskatzjapa.

¹⁰Jalla nekztanaqui wejrqui arajpachquin tsjii altu jora nonzinĉha, tuĉ cjiĉi:

—Jaziqui ultim liwriiz tjuĉi tjonĉha, niĉaza Yooz azi tjeez tjuĉi tjonĉha, niĉaza uchum Yooz tjapa mantiz tjuĉi tjonĉha. Niĉaza Yooziĉ uchta Jesucristuĉ mantiz tjuĉi tjonĉha.

Uĉhum criichinacĉ quintariunacaqui ĉjatkatta cjequiĉha. Majiĉnami weenami nii anawaliqui Yooz yujquiz criichinacĉ quintra uj tjojtjuĉitaĉha.

¹¹Pero criichinacaqui anawal diablu

atipĉiĉha, Uuzaĉtakaz Jesucristuĉ ticziĉ cjen, niĉaza Yooz taku paljayĉiĉ cjen. Niĉaza nii criichinacaqui Yooz taku paljaycan ana jiwjatchiĉha ticzuca cjenami. ¹²Arajpacha, niĉaza arajpachquin kamĉinaca, cuntintuĉ cjee. Yokquiz kamĉinaca, kotquiz kamĉinaca, anĉchucaquiz anawali cjiskataquiĉha. Diabluqui ĉjatkatzquitiquiztan ancha ŝawjziĉha. Jalla niiqui zizza, muntuquiz kamz timpuqui zkoluckazza.

¹³Jalla nekztanaqui nii dragonqui yokquiz ĉjatkatzquita nayĉcu, naa lucmajch maatiĉ maatakaquiz apziĉha tanzjapa. ¹⁴Nekztan naa maatakaquiz pizc pajk aquilĉ kĉara tjaatkalĉha, ch'ekti yokquin laycan zkoraĉtakaz diabluzquiztan atipzjapa. Yoozqui nii yoka tjaczĉiĉha, maatakaquiz ĉjĉep wata ĉicatchiz ĉherĉiz cjisjapa. Jalla nii yokquin maataqui layĉi atipĉinĉha.

¹⁵Nekztanaqui ŝkoraĉtakaz diabluqui persun atquiztan wacchi kĉaz jotĉiĉha, pujuĉtakaz, kĉaztan nii maataka tjuzjapa. ¹⁶Nekztan yokaqui maatakaquiz yanapzjapa, c'acĉiĉha. Jalla nii c'actiquiz dragonĉ jotta kĉazqui luzziĉha. ¹⁷Nii ĉerĉcu, dragonqui maatakaĉjapa juc'anti ŝawjĉiĉha. Jalla nekztanaqui diabluqui naaĉa majchmaatinacĉ quintra quira zali ojĉiĉha. Naa maataka majchmaatinacaqui tiĉtanacaĉha. Jakziltat Yooz mantitanac ĉaru kamĉhaja, niĉaza Jesucristuĉ tjaajinta ĉaru kamĉhaja, jalla ninacaqui naa maataka majchmaatinaca cuntaĉha. Nii diabluqui quira zali ojĉĉcu, kot atquiz tsijtsiĉha.

PIZC ANAWAL ANIMALANACA CHERCHINĉHA

13 ¹Jalla nekztanaqui ĉawc kot kĉazquiztan tsjii

anawali pajk animala ulanžquini cherchinča. Jalla nii animalaqui pakallaw achchiztača, nižaza tunca wajrichiztača, nižaza zapa wajriquiz mantiņi žoņž pillunacžtan tewžintatača. Nižaza achanacquiz Yooz quintra tjuu cjiirtatača. ²Jalla nii weriž cherta animalatača tigriztakaz tsijtchi. Nižaza niž ataqui leonž atažtakaztača. Jalla nekztan dragonžtakaz diabluiqui nii anawal animalžquiz niž poderchiz puestu tjaachiča, walja azziz mantizjapa. ³Tsjii achaqui nii animalž pakallaw achanaquiztan ticskatzmaya chjoirichtažtakaztača. Pero ana ticziča. Antiz žejtchiča. Nekztanaqui ispantižcuqui tjapa tii muntuquiz žejlņi žoņinacaqui anawal animala apziča. ⁴Žoņinacaqui nii dragōn diablūžquiz rispitchiča, Yoozquiztakaz. Nižaza nii dragonqui anawal animalžquiz niž mantiz poder tjaachiča. Jalla nižtiquiztan žoņinacaqui nii animalžquiz rispitchizakazza, tuž cjan:

—ĽJakziltat tii animalžquiztan juc'ant azzizqui? ĽJequit tii animala atipasajo? ⁵Nekztan nii anawal animalaqui mit takunacami Yooz quintra chiita takunacami chiizjapa permitta cjiissiča. Nižaza puzi tunc paan jiiznaca watzcama mantiz poderchiz cjequiča. ⁶Jalla nekztanaqui anawal animalaqui Yooz quintra chiichiča, Yooz tjuu quintrami, nižaza Yooz timplu quintrami, nižaza arajpachquin kamņinacž quintrami. Jalla nižta quintra chiichiča. ⁷Nižaza anawal animalaqui Yoozquin criichinacž quintra quira zalajo permittatača, ninaca atipzcam. Nižaza nižquiz mantiz poder tjaatatača, tjapa zaranacchiz žoņinacžquizimi, tjapa

watjanacchiz žoņinacžquizimi, tjapa takunacchiz žoņinacžquizimi, tjapa nacionanacchiz žoņinacžquizimi, jalla tjapa nii ana criichi žoņinacžquizimi mantizjapa. ⁸Yoozquin ana criichiž cjen žoņinacaqui anawal animalžquiz rispitchiča, Yoozquiztakaz. Nii animalžquiz rispitiņi žoņinacž tjuunacaqui anaž cjiirtača, Uuzažtakaz Jesucristuž liwruquiz. Liwriita žoņinacž tjuunaca Jesucristuž liwruquiz cjiirtača. Jalla ninacž laycu ticziča Jesucristuqui. Ima tii muntu kalltan, jakziltižquiz Jesucristuqui wiņay žeti tjaachaja, jalla ninacž tjuunaca cjiirchiča arajpach liwruquiz.

⁹Jakziltat nonžni cjuņchizlaja, nonžla. ¹⁰Jakzilta žoņit preso chjichta cjechaj niiqui, panž chjichtaž cjequiča. Nižaza jakzilta žoņit pajk cuchillžtan conta cjechaj niiqui, panž conta cjequiča. Jalla nižtiquiztan Yooz wajtchiz žoņinacaqui Yoozquin tjapa kuztan cjis waquiziča, nižaza pasinsis kuztan cjis waquiziča, sufrisnaca watzjapa.

SEGUNDO ANAWAL ANIMALA

¹¹Jalla nekztanaqui yekja anawal animala cherchinča yokquiztan ulanņi. Jalla nii animalaqui pizc wajrichiztača, uuzažtakaz. Pero dragonžtakaz chiyatča. ¹²Jalla nii segundo anawal animalaqui tjapa nii primir animalž poderchiz mantichiča, primir animalžtan chica žejlcan. Nižaza segundo animalaqui tjapa tii muntuquiz žejlņi žoņinaca primir animalžquiz rispitskatchiča. Primir animalatača ticzmaya chjoirichtiquiztan žejtchiqui. ¹³Nižaza segundo animalaqui pajk milajrunaca paachiča. Tsewtan yokquiz uj tjojtskatchiča žoņinacž cheran. ¹⁴Jalla nižta milajrunaca payi

permittatacha, primir animalaž želan. Jalla nižta milajrunaca paachiž cjen, tii muntuquiz kamñi žoñinacžquiz incallchiča. Nižaza žoñinaca mantichiča, chjojrichtiquiztan žejtchi animalž irata tsjii yooz paajo. Nekztan mantichiča, nii yooz rispajajo. Nii primir animalatacha pajk cuchillžtan chjojrichtaž cjenami, wilta žejtchi cjissiqui. ¹⁵Segundo animalaqui primir animalž irata paata yooz žejtñi cjiskatchiča. Nižta poderchiz cjissiča segundo animalaqui. Jalla nuž žejtñi cjan, nii paata yoozqui chiiñi cjissiča. Nižaza jakziltat nii yooz ana rispitchaja, jalla niiqui contaj cjila, mantichiča žejtñi chiiñi yoozqui. ¹⁶Nižaza segundo anawal animalaqui mantichiča, tjapa žoñinacž yujc ayquizimi už žew kjarquizimi chimputa cjisjapa. Koltanacami, pajkinacami, ricachunacami, porinacami, žoñž mantuquiz cjiñinacami, ana žoñž mantuquiz cjiñinacami, liwj mantichiča, chimputa cjeajajo. ¹⁷Ana chimputa cjenauqui ana kjaychucatača, nižaza ana tuychucatača. Nii chimpupui tužutača, žoñž ayquiz anawal animalž tjuužtan už anawal animalž numeružtan cjiirtatažlaja, jalla nii. ¹⁸Jalla nii intintisjapauqui walja zizñi cjistanča. Jakziltat zizñi cječhaja, jalla niiqui anawal animalž número tantiiz waquiziča. Nižaza nii numeruqui žoñinacž numeruča. Jalla nii numeruqui sojta patac sojta tuncan sojtani, jalla niiča.

144,000 ŽOÑINACA CHERCHINČA

14 ¹Jalla nekztanaqui Sión cjita cur kjutñi cherchinča. Jalla nicju Uuzažtakaz Jesucristuqui tsijtchi želatča. Niižtan chica 144,000 žoñinaca želatča. Nii žoñinacž ayquiz

Jesucristuž tjuumi, niiz Ejpž tjuumi, jalla nii tjuunaca cjiirtatača. ²Jalla nekztanaqui arajpachquiztan tsjii jora nonzinča, wacchi pujunacž kjaz joražtakaz, nižaza pjursanti jorjorñiž joražtakaz. Nižaza nii weriž nonžta joraqui suyniñitača, jaknužt wacchi arpa quitaranaca suyničaja, jalla nižta. ³Jesucristužtan žejlñi žoñinacaqui ew wirsu itsiča. Nii mantiz puestuž yujcquiz nižaza nii pajkpic žejtñinacž yujcquiz, nižaza nii jilirinacž yujcquiz itsiča. Anaž iya jakziltami nii ew wirsu catoki atatča; nii 144,000 jalla nii alaja nii wirsu catokchiča. Nii 144,000 žoñinacaqui yokquiztan liwriitatača. ⁴Jalla ninacaqui ana zalzi nižaza ana čjul maatakatan adulteriužtakaz paachiča. Jalla ninacaqui Uuzažtakaz Jesucristo apziča, jakziquin ojktčhaja, jalla nii. Nižaza ninacatača žoñinacžquiztan primero liwriita žoñinacaqui. Yooztajapami Uuzažtakaz Jesucristužtajapami liwriitatača. ⁵Jalla ninacatača ana zinta toscara čhiichiqui, nižaza ana čjul ujchiztača.

ČHJEP ANJILANACA CHERCHINČA

⁶Jalla nekztanaqui arajpach taypiquiz tsjii anjila layñi cherchinča. Nii anjilaqui liwriiñi tawkchiztača, tii muntuquiz kamñi žoñinacžquiz parliñijapa. Nii liwriiñi takuča wiñayjapa werar razunaqui. Nii liwriiñi takuqui tjapa žoñinacžtajapa, tjapa nacionanacchiz žoñinacžtajapami, nižaza tjapa zaranacchiz žoñinacžtajapami, nižaza tjapa takunacchiz žoñinacžtajapami, nižaza tjapa watjanacchiz žoñinacžtajapa, jalla ninacžtajapatača. ⁷Jalla nii anjilaqui altu joržtan tuž čhiichiča: —Yoozquin rispitiñiž cjee. Niižquin honora waytiñiž cjee. Niiž ultim

casticz ora tjonča. Niiqui arajpachami, yokami, kot kjaznacami, nižaza kjaz jalzurinacami paachiča. Jalla nižtiquiztan niižquiz rispitičjee.

⁸Jalla nekztanaqui yekja anjilaqui apžquichiča, tuž cjican:

—Babilonia, nii pajk watjaqui akziča, akziča. Nii watjaqui parti watjanacchiz žoñinacžquiz anawali kamañchiz cjiskatchiča, jaknužt adulteriuquiz ojklayñinacaqui ana zuma kamañchizlaja, jalla nižta.

⁹Jalla nekztanaqui tercer anjilaqui apžquichiča, altu joržtan tuž cjican:

—Jakziltat nii anawal animala rispitchaja, nižaza nii žoñiž paata yooz rispitchaja, jalla niiqui castictaž cjequiča. Nižaza jakziltat niiž ayquiz anawal animalž chimputa cječhaja, už kjarquiz anawal chimputa cječhaja, ¹⁰jalla niiqui Yoozič castictaž cjequiča. Jalla nii ana ultim Yooz rispitič žoñinacž quintra Yoozqui ancha žawjwaquiča. Yoozqui ninaca ancha casticaquiča. Ninacaqui infiernuquin nižaza asñi azupriquiz ancha t'akjizaquiča. Yooz zuma anjilanač yujcquizimi, Uuzažtakaz Jesucristuž yujcquizimi.

¹¹Infiernuquin wiñayjapa sufran, uj žketiqui žketaquiča watay wata. Nii sufriči žoñinacača majiñami weenami jeejzqui ana žejlchuca. Ninacaqui anawal animala rispittiquiztanami nižaza nii paata yooz rispittiquiztanami jalla nižta ancha sufraquiča. Nižaza ninacaqui nii anawal animalž tjuužtan chimputaž cjen nižta ancha sufraquiča. ¹²Jakziltat Yooz partiquiz žejlčhaja, nižaza Yooz tawk jaru kamčhaja, nižaza Jesucristužquin kuz tjaačhaja, jalla ninacaqui tii muntuquiz pruebanaca watcan pasinsis kuzziz tira tjurt'ichej cjila.

¹³Jalla nekztanaqui wejrqui arajpachquiztan tsjii jora nonzinča. Nii joraqui tuž cjichiča:

—Jalla tiic cjjira: “Tekztan nawjchuc jakziltat Yooz Jiliržquiz tjurt'ichi kuzziz ticznačhaja, jalla niiqui cuntintuž cjequiča”. Espiritu Santuqui tuž cjiča: “Ninacaqui ninacž langzquiztan jeejnaquiča. Nižaza ninacž zuma obranacquiztanami nižaza kamtiquiztanami pactaž cjequiča. Jalla nižtiquiztan cuntintuž cjequiča”.

ŽOÑINACA RICUJTA CUJICHAŽTAKAZ

¹⁴Jalla nekztanaqui tsewc kjutñi cheržcu, chiw tsjiri cherchinča. Nii tsjir juntuñ tsjii žoñižtakaz julzi želatča, kor pillu achquiz tjewzi, nižaza kjarquiz cuchillu tanzi.

¹⁵Nekztanaqui tsjii anjilaqui arajpach Yooz timpluquiztan ulanchiča altu joržtan kjawcan. Nii tsjir juñtuñtan julzi žoñžquiz paljaychiča, tuž cjican:

—Tii muntuquiz žejlñi cujich ora tjonchiča. Cujichaqui zuma pookchiča. Jalla nižtiquiztan am cuchillžtan pootzna, cujicha ricuja. —Nuž cjichiča anjilaqui. Tii muntuquiz žejlñi criichi žoñinacača cujichažtakazqui.

¹⁶Jalla nekztanaqui nii tsjir juñtuñtan julzi žoñiqui cuchillžtan tii muntuquiz žejlñi cujicha ricujichiča. Jalla nižtiquiztan Yoozquin criichi žoñinacaqui ricujta cjissiča.

¹⁷Nekztanaqui tsjii yekja anjilaqui arajpach Yooz timpluquiztan zakaz ulanchiča, cuchillžtan zakaz.

¹⁸Nekztanaqui tsjii anjilaqui arajpach Yooz altarquiztan ulanchizakazza. Nii anjilaqui akzjapa poderchizza. Nekztanaqui nii anjilaqui segundo cuchillžtan anjilžquiz paljaychiča, altu joržtan tuž cjican:

—Am cuchillžtan uwas cujicha ricuja. Uwasnacaqui zuma pookchiča.

Jaziqui nii ricuja. —Nuž cjichiča anjilaqui. Tii muntuquiz žejlñi ana criichi žoñinacača uwas cujichažtakazqui.

¹⁹ Jalla nekztanaqui nii anjilaqui cuchillžtan ana Yoozquin criichi žoñinaca cujichažtakaz pootchiča, nižaza ricujchiča. Nekztan nii ricujta žoñinacaqui uwas cujich uyquiztakaz tjojtatača, Yooz casticta cjisjapa.

²⁰ Jalla nekztanaqui jaknužt ricujta uwasanaca tjecančhaja, jalla nižta nii ricujta žoñinacaqui castictatača Yooz wajtž tjiuin. Jalla nuž castictaž cjen, ancha ljoc ojkhicha, cawallunacž freno irantizcama. Quinsa patac kilómetro larcuquin nižta ljoc ojkhicha.

PAKALLAWK ANAWALINACA

15 ¹ Jalla nekztanaqui arajpachquin tsjii siñala cherchinča. Nii pajk siñalaqui ancha ispantichucatača. Pakallawk anjilanacaqui želatča, pakallawk anawalinacchiz. Jalla nii anawalinaca wattan Yooz casticz žerzta cjequiča.

² Nižaza llijñi kota cherchinča, ispijužtakaz ujžtan t'ajžta. Nižaza nii ispijužtakaz kot atquin žoñinaca tsijtchi želatča. Nii žoñinacaqui Yooz arpi guitarra tanzi želatča. Nii žoñinacaqui tii muntuquiz kamcan, anawal animalquiztan atipchiča, nižaza niž paata yoozquiztan atipchiča. Nižaza nii anawal animalž tjuužtan ana chimputatača. ³ Jalla nii žoñinacaqui Yooz sirwiñi Moisés itsñi itsatča, nižaza Uuzažtakaz Jesucristuž itsñi itsatča, tuž cjican:

“Tjapa azziz Yooz Jiliri, amiž paata pajk obranacača ancha zumanacaqui, nižaza ispantichucača. Am kamañaquei zuma lijitumča, werarapanča.

Amča tjapa nacionchiz žoñinaca mantiñamqui. ⁴ Yooz Jiliri, ¿ject amquin ana eksnasa? ¿Ject amquin honora ana tjaasa? Am alaja ancha zumampanča. Amča zuma lijituma pjalzñamqui, jalla nižtiquiztan tjapa nacionquiztan žoñinacaqui tjonaquiča, am rispitzjapa”.

⁵ Jalla nekztanaqui arajpachquin cherchinča timplu kjuyltan. Jakziquizlaj Yooz lii, jalla nekz Yooz žejlž kjuya cjetzi cherchinča.

⁶ Nekztan cherchinča, timpluquiztan pakallawk anjilanacaqui pakallawk anawalinac casticchiz tjonchiča. Ancha zuma llijñi tol zquitchiztača, nižaza kor tsjaychiztača, quecanaca jweržinta. ⁷ Jalla nekztanaqui tsjiuqui pajkpic žejtñinacžquiztan zapa mayni pakallawk anjilanacžquiz kor chuwa tjaachiča. Nii chuanacaqui wiñay žejtñi Yooz casticunaca chjijpžtatača. ⁸ Nii timpluqui uj žketžtan chjijpžtatača, Yooz juc'ant azziz cjen, nižaza juc'ant honorchiz cjen. Nižaza anaž jecmi nii timpluquin luzi atasača, nii pakallawk anjilanacž anawalinaca watzcama.

ANAWALINACA CUTZTA

16 ¹ Jalla nekztanaqui tsjii alto chiiñi jora nonzinča. Timpluquiztan nii joraqui pakallawk anjilanacžquiz paljaychiča, tuž cjican: —Oka. Ančhucaqui nii intirjita anawalinaca cutzna. Nii anawalinacžtan Yoozqui žoñinaca casticaquiča. —Jalla nuž paljaychiča nii joraqui.

² Jalla nuž paljaytiquiztan primir anjilaqui ojkhicha nižquiz intirjita anawalinaca tii muntu yokquiz cutzjapa. Jalla nekztanaqui jakziltat anawal animalž chimputažlaja,

nižaza nii anawal animalž žoñiž paata yoozquiz rispitchaja, jalla tjapa ninacaqui anawal llajanacžtan llajchiča. Nižaza ancha kjawcan aynatča.

³ Jalla nekztanaqui segundo anjilaqui ojkchiča nižquiz intirjita anawalinaca tii muntu kotquiz cutzjapa. Nii kot kjazqui ticzi žoñž ljocnacažtakaz tucchiča. Jalla nižtiquiztan tjapa kotquiz zejlñi animalanacaqui ticziča.

⁴ Jalla nekztanaqui tercer anjilaqui nižquiz intirjita anawalinaca pujunacquizimi jalzurinacquizimi. Tjapa kjazqui ljoc tucchiča. ⁵ Jalla nekztanaqui kjaz mantiñi anjilaž chiita nonzinča. Nii anjilaqui tuž cjichiča: —Ancha zumamča Yooz Jiliri.

Amqui tuquitanami jaztanami žejlča. Amqui lititumakaz pjalžcu, casticča.

⁶ Nii casticta žoñinacaqui am parti žoñinacami, nižaza am parti parliñi žoñinacami conchiča. Jaziqui amqui nii žoñinacžquiz ljoc lickatchamča. Jalla nužupan ninacžta waquiziča.

⁷ Nižaza altarquiztan tsjii chiižquiñi jora nonzinča, tuž cjican:

—Tjapa azziz Yooz Jiliri. Amqui ultim werara pjalzamča; nižaza lititumapan pjalžnamča. Jalla nužupanča.

⁸ Jalla nekztanaqui cuarto anjilaqui nižquiz intirjita anawali cutziča tjuñquiz. Jalla nuž cutžtiquiztan, tjuñiž siqui žoñinaca ujsiča, zmali kjakcan. ⁹ Jalla nižtiquiztan žoñinacaqui tjuñiž ujta cjissiča. Jalla nuž ujtiquiztan, žoñinacaqui ana persun uj paaznacquiztan jaytichiča, “Ujchizpantča” cjican. Nižaza Yoozquin ana honora tjaachiča. Antiz Yooz tjuu quintra chiichiča, Yooz nii anawalinaca mantižquichiž cjen.

¹⁰ Jalla nekztanaqui quinto anjilaqui nižquiz intirjita anawali

cutziča, jakziquin nii anawal animalaqui mantiñi julzičhaja, jalla nicju. Jalla nekztanaqui nii mantita yokaqui ancha zumchi cjissiča. Jalla nuž cjen žoñinacaqui persun las ch'atsiča; ancha t'akjizichiča.

¹¹ Jalla nuž sufrichiž cjenami, ana jaytichiča anawali paaznacquiztan, “Ujchizpantča”, cjicanaqui. Pero arajpach Yooz quintra chiichiča, ninacaž nuž ayinskatñi llajacama cjenauqui.

¹² Jalla nekztanaqui sexto anjilaqui nižquiz intirjita anawaliqui pajk Eufates cjita pujquiz cutziča. Jalla nuž cutztiquiztan, nii pujuqui kjonchiča, tuwantan tjonñi jilirinaca kjakžquizjapa.

¹³ Nekztanaqui cherchinča anawal dragonž atquiztan anawal ispiritu ulanchiča. Jalla nižtakaz ulanchiča anawal animalž atquiztanami, nižaza falso profetž atquiztanami.

Nii čhjep ulanchi ispiritunacaqui zcaranacažtakaztača. ¹⁴ Nii ispiritunacaqui zajra ispiritunacatača. Milajrunacaž paa-atča. Nižaza tjapa tii muntuquiz mantiñinacaž juntatča, quira zaltisjapa. Tjapa azziz Yooz Jiliriž uchta timpu pajk quira želaquiča.

¹⁵ Nonžna. Jesucristuqui tuž cjiča: “Wejrqui tjañižtakal tiripintit tjonacha. Jakzilat naazñi kuzziz cječhaja, cuntintuž cjequiča. Zquitchizpan cjee; nekztan ana k'ala okasača, žoñinacaž ombrawillta cjisjapa”. ¹⁶ Jalla nekztanaqui mantiñi jilirinacaqui juntantitaž cjissiča, tsjii yokquiz. Nii yokaqui hebreo tawkquiz Armagedón cjitača.

¹⁷ Jalla nekztanaqui séptimo anjilaqui intirjita anawaliqui querquiz cutziča. Jalla nuž cutztiquiztan altu joraqui arajpach timpluquiz mantiz puestuquiztan chiichiča, tuž cjican:

—Yooz casticz obranaca cumplita cjiissa.

¹⁸Jalla nekztanaqui rayunacami, arañinacami, jorjorñinacami želatčha. Nižaza juc'anti yoka chekjinchičha. Yooziž žoñi paatiquiztan jalla nii timpuquiztan anzcama tii yokaqui ana wira juc'anti chekjinchičha. Walja tsucuñi cheknatčha. ¹⁹Jalla nuž yoka chekjinzcu, Jerusalén pajk watjaqui čhjep parti t'akžtatačha. Nižaza nacionanacž capitalanacaqui k'ala pajlsičha. Nižaza Yoozqui Babilonia pajk watja cjuñzičha. Yoozqui Babilonia wajtž quintra žawjžcu, juc'anti casticchičha, jaru vinžtan liquintažtakaz. ²⁰Jalla nuž castican tjapa kot taypiquiz žejlñi yokanacami, nižaza curunacami katchičha. ²¹Nižaza arajpachquiztan žoñinacž juñtuñ pajk caranuzatjojtžcu, ojkchičha. Tsjii caranuzauqui quintal jilatačha, ancha liczitačha. Nekztanaqui žoñinacaqui Yooz quintra chiichičha nii caranuzaj nuž ojktiquiztan. Jalla nii anawaliquiztan ancha sufrichičha.

PUTIRII MAATAKA CHERCHINČHA

17 ¹Jalla nekztanaqui tsjii nii pakallawk ana walinacchiz anjilanacžquiztan wejtquiz tjonchičha, tuž cjican:

—Pichay. Putirii maataka amquiz tjeeznačha. Naa putirii maatakaqui pajk watja cjičha. Jaknužt nii pajk watja casticta cječhaja, jalla nii zakal tjeeznačha. Jalla nii anawal watjaqui wacchi kjaznacaran žejlčha. Juc'ant anawali putirii maatakažtakazza nii watjaqui. ²Tii yokquiz mantiñi jilirinacaqui naa putiriyatan adulteriuquiz ojklaychičha. Naa irat kamañchiz pecžcu, Yoozquiztan ancha zarakchičha nii mantiñinacaqui. Jaknužt vinžtan licchi žoñiqui tsjii kjutñi ojkčhaja, jalla nižta cjiissičha.

³Jalla nekztanaqui Espiritu Santuqui wejr cherkatchičha jalla tižta. Tsjii anjilaqui wejr chjitchičha ch'ekti yokquin. Jalla nieju tsjaa maataka cherchinčha. Jalla naa maatakqui ljoc animalž juntuñ yawchi želatčha. Jalla nii animalaqui persun curpuquiz Yooz quintra tjuunacchiztačha. Nižaza pakallawk achchiztačha, nižaza tunca wajrichiztačha. ⁴Naa maatakqui morat ljoc zquiti cujtchintačha. Nižaza koržtan, c'ajñi mazllanacžtan, c'achanacžtan, jalla ninacžtan alajitačha. Nižaza naaža kjarquiz kor wazu tanzinčha. Nii kor wazuquiz anawalinacžtan nižaza ana zuma kamañanacžtan chjiipžtatačha. ⁵Nižaza naaža ayquiz tii ana intintazzuca tjuu cjiirtatačha: “Pajk Babilonia, putirii maatakanacž maa, nižaza tii yokquiz ana zuma kamañanacchiz maa”. Jalla nuž cjiirtatačha. ⁶Nekztanaqui wejrqui naa maatak cherchinčha licchižtakaz. Naa maatakqui wacchi Yoozquin criichinaca conchinčha. Jesucristužquiz kuz tjaachiž cjen contatačha nii criichinacaqui. Ninacž ljocžtan licchižtakaz cjistkalčha. Jalla naa maataka cheržcu, wejrqui ancha ispantichinčha. ⁷Weriž ispanitiquiztan anjilaqui wejtquiz paljaychičha, tuž cjican:

—¿Kjažtiquiztan am ispantejo?

Wejrqui naa maatakaž ana intintazzuca puntu amquiz maznačha. Nižaza nii pakallawk achchiz, tunca wajrichiz animalž ana intintazzuca puntu amquiz maznačha. ⁸Maatakaž yawta animala cherchamčha. Jalla nii animala tuquitan tii muntuquiz želatčha. Nekztan ana želatčha. Wiruñ wilta želaquičha, koz anawal tujquiztan ulanžcaquičha. Ultimiquizqui infiernuquin chjatkattaž cjequičha. Tuquitan tii

muntu paatiquiztanpacha Yoozquin ana criichi žoñinacž tjuunacaqui anaž Yooz liwruquiz cjiirtatačha. Jalla nii žoñinacaqui anawal animala cheržcu ispantaquičha. Nii animalaqui žejlchičha, nekztan ana želatčha, nekztan wilta žejlčha. Jalla nižtiquiztan ana criichi žoñinacaqui ispantaquičha.

⁹Jalla nii intintizjapa intintiñi kuzziz cjis waquizičha. Nii anawal animalž pakallawk achaqui pakallawk curunaca cjičha. Nii curunacž juntuč tsjii watja julzi žejlčha. Putirii maatakažtakazza nii watjaqui. ¹⁰Nii pakallawk achanacaqui pakallawk mantiñi jilirinaca cjičha. Pjijzkaltan mantiñinacaqui ezzičha; katchičha. Tsjii mantičha anziqiu. Nii tsjiiqui ima tjončha. Jalla nii tjonžcu upacamakaz mantaquičha. ¹¹Nii tuqui žejlñi, nekztan ana žejlñi animalaqui octavo mantiñi jiliričha. Pero nii pakallawk mantiñinacž partiquiztankalčha. Nižaza ultimquiziqui infiernuquin chjatkattaž cjequičha.

¹²Nižaza nii amiž cherta tunca wajranacaqui tunca mantiñi jilirinaca cjičha. Nii tunca mantiñinacaqui imaž mantiz poder tanža. Nii anawal animalžtan chica tsjii orakaz mantaquičha. ¹³Nii tunca mantiñinacaqui tsjii kuzzizza; ninacž mantiz poder tjaaquičha anawal animalžquiz. ¹⁴Nii anawal mantiñinacaqui Uuzažtakaz Jesucristuž quintru quira zaltayskataquičha. Pero Uuzažtakaz Jesucristuqui criichi žoñinacžtan ninacžquiz atipaquičha. Jesucristuqui Jiliric jiliripančha, rey mantiñic mantiñipančha. Criichi žoñinacaqui nižtan chica želaquičha. Criichi žoñinacačha Yooziž kjawžta, nižaza illzta, nižaza Yoozquin tjurt'iñi kuzzizpan.

¹⁵Jalla nekztanaqui nii anjilaqui wejtquiz cjichizakazza:

—Nii amiž cherta kjaznacaqui, jakziquin naa maataka julzinžlaja, jalla nii kjaznacaqui žoñinaca cjičha. Nii žoñinacaqui tjapaman watjanacchiztačha, nižaza nacionanacchiztačha, nižaza takunacchiztačha. ¹⁶Nižaza nii amiž cherta tunca wajranacažtakaz mantiñinacaqui anawal animalžtan naa putirii maatak quintru chjaawjkataquičha. Nekztan naa maataka akznaquičha, nižaza ana zquitchiztakaz cjiskataquičha. Nižaza naaža curpu lujlnaquičha. Nižaza ujžtan ujznaquičha. ¹⁷Jalla nuž nii mantiñinacaqui naa maatakaquiz paaquičha. Yoozqui ninacž kuznacquiz nuž peckatchičha, Yooz muntacama paa-ajo. Jalla nuž Yooz muntacama paacan ninacaqui tsjii kuzziz cjequičha, anawal animalžquiz ninacž mantiz poder tjaažjapa, Yooz chiitacama cumpliskatzjapa. ¹⁸Nižaza amiž cherta maatakaqui pajk watja cjičha. Nii watjačha tii yokquiz žejlñi mantiñi jilirinacžquiz mantiñiqui.

BABILONIA CJITA WATJA EZZIČHA

18 ¹Jalla nekztanaqui wejrqui tsjii anjila arajpachquiztan chjiwžquini cherchinčha. Nii anjilaqui walja mantiz poderchiztačha; nižaza walja kjanatčha. Nuž kjanan tii yokaqui majiñažtakaz cjissičha. ²Nekztanaqui nii anjilaqui altu joržtan kjawchičha, tuž cjican:

—Babilonia pajk watja ezzičha, ezzičha. Nii wajtquiz zajranacaqui watja chassičha, tjapaman anawal ispiritunacžtan, nižaza tjapaman chjaawjkatta wežlanacžtan. ³Nii Babilonia watjaqui tjapa nacionanaca Yoozquiztan zarakskatchičha,

licchinacažtakaz. Nižaza nii watjaž cjen tjapa tii yokquiz mantiñi jilirinacaqui ana zuma kamañchiz cjissičha. Nižaza nii wajtchiz žoñinacžquiz tjapaman cusasanaca tuytiquiztan, tuyñi žoñinacaqui ricachu cjissičha.

⁴Jalla nekztanaqui wilta tsjii jora nonzinča, arajpachquiztan chiižquiñi. Nii joraqui tuž cjichičha:

—Wejt parti žoñinaca, nii wajtiquiztan ulna, ana nii wajtchiz žoñinacažtapacha uj paazjapa, nižaza nii wajtchiz žoñinacžtanpacha ana casticta cjisjapa. ⁵Nii wajtchiz žoñinacž ujnacaqui juc'anti muntunacžtakaz yapchiča arajpacha irantizcamažtakaz. Juc'anti ujnaca paachiča. Jaziqui Yoozqui ninacaž paata ujnaca naychiča. ⁶Jaknužt nii wajtchiz žoñinacaqui yekja žoñinacžquiz anawali paatčhaja, jalla nii anawal paatiquiztan jama castictaj cjila. Ninacaž ujnaca paatiquiztan pize wilta juc'anti castictaj cjila. Jaknužt yekja žoñinaca anawali cjiskatčhaja, jalla nižta irata pize wilta juc'anti ana wali cjiskattaj cjila. ⁷Jaknužt nii wajtchiz žoñinacaqui ancha persun honora waytitčhaja, nižaza jaknužt ninacaqui persun kuzcama kamtčhaja, jalla nuž anawali kamtiquiztan jama sufriskattaj cjila. Ninacž kuzquiz tuž cjiñitača: “Wejrnacqui juc'ant zumtča. Anawalinaca wejtquiz anapan cjisnasača. Anal wira tsjaa žewažtakaz kaaznasača”.

⁸Jalla nižtiquiztan nii wajtchiz žoñinacžquiziqui casticu tiripintit tjonaquiča. Ninacžquiz ancha anawalinaca tjonaquiča. Jaziqui žoñinaca ticznaquiča; nižaza llacjizaquiča; nižaza čherž kjara paznaquiča; nižaza ujquin ujžtaž cjequiča. Muzpa azziz Yooz Jiliri

nii žoñinaca pjalžcu casticaquiča. Jalla nižtiquiztan nižta anawalinaca tjonaquiča.

⁹Jalla nii cheržcu jakzilta mantiñinacat nii wajtchiz žoñinacžtan ana zuma kamañchizlaja, nižaza persun kuzcama kamchizlaja, jalla ninacaqui nii wajtchiz žoñinacž castictu cheržcu, kaaquiča, nižaza llacjizaquiča. Nii watja ujznan, nii mantiñi jilirinacaqui uj žketñi cheraquiča. Nekztan kaaquiča.

¹⁰Jalla nuž cheržcu, nii watja nuž castictaž cjen, ažkquin tsjtichi želaquiča; ana macjatžcaquiča. Castictaž cjen tsucaquiča, tuž cjican: —iAy! iAy! Babilonia pajk watja. Muzpa azziz cjenacqui, anawali cjissila. Tsjii ratukaz casticta cjissila.

¹¹Nii watja castictaž cjen, tii muntuquiz žejlñi tuyñinacazakaz kaaquiča, nižaza llacjizaquiča. Ninacž cusasanaca kjayñimi ana iya želaquiča. ¹²Ninacž cusasanacaqui tižtanacača: kori, paaz, llijñi maznaca, c'achjanaca, zuma pañu, murat pañu, ser pañu, ljoc pañu, tjapaman zuma ulurchiz tablanaca, zuma marfila cjita maznaca, jila walurchiz maderanaca, korinaca, jirunaca, zuma marmol cjita llijñi maznaca, ¹³canelanaca, zuma ulurchiznaca, insinsunaca, zuma ulurchiz mirra cjitanaca, zuma ulurchiz asitinaca, vinunaca, asitinaca, chiw llamp'u jac'unaca, trigonaca, kuzñi animalanaca, uuzanaca, cawallunaca, autunaca, tuyzjapa piyunanaca. Jalla tjapa nižtanaca tuytatača. ¹⁴Nii tuyñinacaqui nii wajt puntuquiztanž cjequiča:

—Nii wajtquiziqui anaž iya tjapaman zumanaca želaquiča, nii ancha juztažta zumanacaqui. K'ala pertissičha, wiñayjapa. Walurchiz cusasanacaqui pertissičha, nižaza

wajtquiz honora tjaani cusasanacaqui pertissiċha wiñayjapa. —Nuž chiyauquiċha.

¹⁵Nii cusasanaca tuyñinacaqui ricachu cjiſsiċha nii wajtchiz žoñinacaž kjaychiž cjen. Jaziqui tuyñinacaqui nii watja casticu cheržcu, eksni kuztan ažkquin tsijtchi želaquiċha. Nižaza altu joržtan kjawcan, kaaquiċha, nižaza llacjizaquiċha. ¹⁶Nižaza ninacaqui tuž cjequiċha: —iAy! iAy! Anawali cjiſsila tii pajk watjaqui. Tsjaa ricach maatakažtakaz želatċha, iñarato zquitchiz cujtchin, zuma pañ zquitchiz, murat pañ zquitchiz, ljoc pañ zquitchiz. Zuma iñarato želatċha, koržtan, zuma walurchiz maznacžtan, zuma c'achjanacžtan. ¹⁷Tsjii ratukaz tjapa nii wajtquiz walja walurchiz cusasanaca pertissiċha. —Jalla nuž cjequiċha.

Jalla nii watja casticu cheržcu, warcu joojoñinacami, warcuquiz ojklajñinacami, warcuquiz langžñinacami, tjapa kot warcužtan langžñinacami ažkquin tsijtchi želaquiċha. ¹⁸Jalla nii wajtquiztan uj žketni cheržcu, kjawaquiċha, tuž cjican:

—ĖJakzilta watjat tižta chawc watjažtapacha žejljo?

¹⁹Jalla nekztanaqui ninacaqui persun achanacquiz pjilžtan tjatznaquiċha, ancha kaacan, nižaza ancha llacjizcan. Nižaza tuž cjequiċha:

—iAy! iAy! Ana wali cjiſsila nii chawc watjaqui. Nii wajtquin cusasanaca chjitchiž cjen, tjapa warcužtan langžni žoñinacaqui cusa ricachu cjiſsiċha. Nižaza tsjii ratulla akžtala.

²⁰Arajpachquin žejlñinacazti, nii watja akžtaž cjen, cuntintuž cjee. Yoozquin criċhi žoñinaca, cuntintuž cjee. Nii wajtchiz žoñinacaqui anċhucaquiz anawali paachiċha. Yooz

parti žoñinaca, nižaza Yooz uchta apostolonaca, nižaza Yooz puntu parliñinaca, tjapa anċhucaltajapa Yoozqui nii watja casticaquiċha. Jaziqui anċhucaltajapa Yoozqui nii watja casticaquiċha.

²¹Jalla nekztanaqui tsjii walja azziz anjilaqui tsjii pajk maz tjaajžtakaz waytižcu kotquiz tjojtchiċha, tuž cjican:

—Tii maz tjaaj tjojttažokaz Babilonia chawc watja tjojttaž cjequiċha. Anaž wira iya cherta cjequiċha. ²²Tii wajtž calliran anaž wira iya itsni jora nonžtaž cjequiċha, arpi guitar jorami, itsni jorami, pincall jorami, trompet pekz jorami. Nižaza tii wajtquiz anaž wira iya oficiuchiz langžñinacami želaquiċha. Nižaza tii wajtquiz anaž wira iya žoñinaca tjaajžtan jawunni jora nonžtaž cjequiċha. ²³Nižaza tii wajtquiz micha pekžta anaž iya cheraquiċha. Nižaza anaž iya zalžni pjijzta ch'ajwiñi nonznaquiċha. Tuqui tii wajtquiz tuyñinacaqui žoñinacž yujcquiz pajk žoñitaċha. Maña paacan, tii wajtchiz žoñinacaqui tjapa nacionanacchiz žoñinacžquiz incallchiċha.

²⁴Nižaza tii wajtchiz žoñinacaqui Yooz parti žoñinaca, nižaza Yooz puntu parliñinaca conchiċha. Tjapaman žoñinaca contaċha.

ARAJPACHQUIN YOOZQUI HONORCHIZZA

19 ¹Jalla nekztanaqui arajpachquin wacchi žoñinacž jora nonzinċha, tuž cjican:

“iAleluya! Uċhum Yoozza

liwriñiqui, walja azzizza, walja honorchizza. ²Uċhum Yoozza lijituma pjalžñiqui. Jalla nuž Babilonia wajtchiz žoñinaca lijituma casticchiċha. Nii

žoñinacaqui tjapa wajtchiz
žoñinacžquiz ana wali
kamañchiz cjiskatchiċha. Jalla
nižtiquiztan casticta cjissiċha.
Nižaza Yoozquin sirwiñi
žoñinaca conchiž cjen, Yoozqui
nii žoñinaca casticċiċha”.

³Wilta nii arajpachquin
žejlñinacaqui altu joržtan chiichiċha,
tuž cjican:

—iAleluya! Nii wajtquiztan uj žketi
wiñaya žketaquiċha.

⁴Nekztanaqui arajpachquin paa
tunc puzin jilirinacžtan pajkpic
žejtñinacžtan yokquiz quillžcu,
puct'ichiċha. Nižaza Yoozquiz
rispitiċha. Yoozqui niž mantiz
puestuquizaċha. Rispitcan tuž
cjichiċha:

—iNužoj cjila! iAleluya! iAmén!

⁵Nekztanaqui mantiz puestoquiztan
tsjii jora nonzinċha tuž chiižquini:

“Tjapa Yoozquin sirwiñinaca,
Yoozquiz honora waytila.
Koltami pakjimi tjapa Yoozquin
rispitñinacami, Yoozquiz honora
waytila”.

⁶Nekztan wejrqui wacchi žoñinacž
jora nonzinċha. Wacchi kjaz pujquiz
kjawñižtakaztaċha. Nii joranacaqui tuž
cjichiċha:

“iAleluya! Uċhum tjapa azziz
Yooz Jiliriqui tjapa mantiz
kallantichiċha. ⁷Jalla
nižtiquiztan anchaž chipžla
uċhumqui, cuntintuž cjila.
Yoozquin honoraž tjaala.
Uuzažtakaz Jesucristužtan niž
parti žoñinacžtanuntu kamz
ora irantižquichiċha, tsjii zalz
pijista oražtakaz. Jesucristuž
parti žoñinacaqui listu tjacziċha,
zalziñ turažtakaz. ⁸Finu
zquitinacžtan cujtziċha; ancha
limpu, nižaza llijñitaċha”.

Nii finu zquitinacžtan cujtchi tuž
cjiċha, Yoozquin criichinacaž zuma
kamañanacchiz, jalla nii. Jalla
nuž zquitinacžtan cujtzkatchiċha
Jesucristuž parti žoñinacžquiz.

⁹Jalla nekztanaqui tsjii anjilaqui
wejtquiz paljaychiċha tuž cjican:
—Jalla tuž cijira: “Uuzažtakaz
Jesucristuž zalz pijiztiquiz invittanaca
cuntintoj cjila”.

Nižaza wejtquiz cjichiċha:

—Jalla tii weriž chiita takunacaqui
Yooz zuma werar razunanacaċha.

¹⁰Jalla nižtiquiztan wejrqui nii anjilž
kjojchquiz quillžcu puct'ichinċha,
nii rispitzjapa. Nižti wejtquiz
chiižinchiċha, tuž cjican:

—Ana nižta paa. Wejrqui Yooz
sirwiñtċha, amtan chica, nižaza
am jilanacžtan chica. Tjapa
anċhucċha Jesucristuž puntuquiztan
parliñinacaqui. Yoozquin alaja rispita
amqui.

Jakziltat Jesucristuž puntuquiztan
mazinċhaja, jalla niiċha werar Yooz
taku parliñiqui.

CHIW CAWALLQUIZ YAWCHI ŽOÑI

¹¹Jalla nekztanaqui arajpacha cjetzi
cherchinċha. Jalla nicju tsjii chiw
cawallu jeczquichiċha. Calwallquiz
tsjii zuma žoñi yawchi cherchinċha.
Nii žoñiqui Zuma Lijituma cjitaċha,
nižaza Werar Razunchiz cjitaċha. Jalla
nii žoñiċha zuma llijituma pjalzñiqui,
nižaza ultim werar razunquiztanċha
quira zaltiñiqui. ¹²Nii žoñž
ċhjujquinacaqui ujžtakaz c'ajataċha.
Niiž achquiz wacchi mantiñi žoñinacž
pillunacchiztaċha. Nižaza nižquiz
tsjii tjuu cjiirtataċha. Nii tjuuqui
niikaz zuma intintićha. ¹³Nii žoñiqui
ljocžtan tinta tol zquitchiztaċha. Niiž
tjuuqui Yooz Taku cjitaċha. ¹⁴Niižquiz
apzcatċha arajpach zultatunaca;

chiw finu zquitchiznacatacha, niżaza limputača. Nii zultatunacatacha chiw cawallunacquiz yawchi. ¹⁵Nii zuma žoňž atquiztan tsjii pajk ar cuchillu ulanchiča, nacionanacchiz žoňinaca casticzjapa. Tjapa nacionanacchiz žoňinacžquiz mantaquiča, tjapa anawali paatiquiztan jama casticcan. Jaknužt tsjii uwas cujichñi žoňiqui uwas kjaz zpjiťzjapa tjecančhaja, jalla niža irata nii zuma žoňiqui Yooztajapa quintr žoňinaca tjecnaquiča. Tjapa azziz Yoozza anawali žoňinacž quintr žawjchipan. Anziqui ninaca casticta cjissa. ¹⁶Nii tjecanñi žoňž tol zquitquizimi niž lizquizimi tii tjuu cjiťrtatača: “Tjapa mantiñi reynacžquiztan tsjan reyča. Niżaza tjapa jilirinacžquiztan tsjan jiliriča”.

¹⁷Jalla nekztanaqui cherchinča, tsjii anjila tjuñquiz tsijtchi. Alto joržtan arajpachquin laylayñi wežlanaca kjawziča, tuž cjan:

—Tekchuc picha. Niżaza tekz ajcsca, Yooz tjaata čhjeri lujlżjapa. ¹⁸Tekz ajcsca, mantiñi reynacž janchi lujlżjapa, niżaza zultatu mantiñinacž janchi lujlżjapa, niżaza tjup kuzziz žoňinacž janchi lujlżjapa, niżaza cawallunacž chjizwimi nii yawchi žoňinacž janchimi lujlżjapa, niżaza tjapaman žoňinacž janchi lujlżjapa, žoňž mantuquiz cjicjiñi žoňinacž janchimi, ana žoňž mantuquiz cjicjiñi žoňinacž janchimi, kolta žoňinacž janchimi, pajk žoňinacž janchimi; tjapaman žoňinacž janchi lulaquiča. —Nuž cjichiča anjilaqui.

¹⁹Jalla nekztanaqui cherchinča, nii anawal animalžtan yokquiz mantiñi reynacžtanami ninacž zultatunacžtanami ajcsitača, chiw cawallquiz yawchi žoňž quintr kichjasjapa, niž zultatunacžtanpacha.

²⁰Quira zaltiču, nii anawal

animalaqui preso tanta cjissiča, falso profetžtan chica. Jalla nii falso profetaqui animalž yujcquiz milajrunaca paachiž cjen, nii animalaž chimputa žoňinaca incallchiča; niżaza nii animalž žoňž paata yoozquiz rispitñi žoňinaca incallchizakazza. Jalla nii pucultan anawalinacaqui azupri inñiernuquin tojtatača, žejtñi sufrisjapa. ²¹Nii chiw cawallquiz yawchi žoňiqui parti quintr žoňinaca pajk cuchillžtan conchiča. Nii pajk cuchilluča nii žoňž atquiztan ulanchiqui. Jalla nižtiqiztan tjapa nii ajcsi wežlanacaqui ninacž janchižtan, chjizwinacžtan ancha chjekchi cjissiča.

WARANK WATA PUNTU

20 ¹Jalla nekztanaqui tsjii anjila cherchinča, arajpachquiztan tjonñi. Nii anjilaqui kjarquiz llawi tanziča; niżaza pajk carina tanziča. Nii llawiqui koz anawal tuj llawitača. ²Nekztan nii anjilaqui dragón tanchiča. Dragonqui žkoražtakaz Satanás diabluča. Jalla nii diabluqui warank wata watzcama čejltača. ³Nekztan nii anjilaqui diablu tojtčcu, koz tuj chawjcchiča. Niżaza tsjii estampillžtan žcatžinchiča, diabluž nacionanacchiz žoňinacžquiz ana iya incallajo, warank wata watzcama. Jalla nii warank watanaca wattanaqui, wilta cuchta cjistanča tsjii upacamakaz.

⁴Jalla nekztan mantiz puestunaca cherchinča. Jalla nii puestunacquin julzi žoňinacaqui pjalżjapa poderchiztača. Niżaza acha muržinta criichinaca cherchinča. Nii criichinacaqui contatača, Yooz taku parlitiqiztan, niżaza Jesucristuž puntuquiztan ticlartiquiztan. Ninacaqui anawal animalžquizimi niżaza niž paata yooznacžquizimi ana rispikalča. Niżaza

anatacha anawal animalž chimputa, ana yujc ayquizimi, ana kjarquizimi. Jalla nii conta criichinacaqui jacatatchi cherchincha. Warank watanaca Cristužtanuntu mantaquičha. ⁵Jalla niicha primiru jacatatzqui. Parti ticzi žoñinacaqui ana jacatatchiicha nii warank watanaca watzcama. ⁶Nii primiru jacatatchinacaqui cuntintuž cjequičha. Ancha zuma kamañchiz cjequičha. Nii segundo ticzqui ninacžtaqui ana želaquičha. Nii segundo ticzqui tuž cjičha, infernuquin chjatkatta wiñayjapa casticta cjisjapa. Pero nii jacatatchinacaqui Cristužtanuntu mantaquičha warank watanaca. Ninacaqui Yooztajapami Cristužtajapami sirwiñinaca cjequičha.

⁷Jalla nii warank watanaca wattiquiztan Satanás diabluiqui cuchtaž cjequičha koz tujquiztan. ⁸Jalla nuž cutztiquiztan Satanás diabluiqui ulnaquičha tjapa tii yokquiz žejlñi nacionanaca incallzjapa. Gog cjita naciona, nižaza Magog cjita naciona nižaza tjapa nacionanacžquiz incallžcu, quira zalzjapa ajcskataquičha. Jalla nii nacionanacchiz zultatunacaqui walja tamačha, kot at pjilažtakaz. Nuž cherchincha. ⁹Nii zultatunacaqui walja campuquin ojkechičha, Yooz parti žoñinaca muyuntizjapa, nižaza Yooziž pecta watja muyuntizjapa. Jalla nuž muyuntan, Yoozqui arajpachquiztan uj cutzinžquichičha, ninaca k'ala ujjjapa. ¹⁰Nekztanaqui incallñi diabluiqui azuprižtan asñi uj kotquin tjojtatačha. Jalla nicju tuquiqui anawal animalžtan toscar profetžtan tjojtatačha. Jalla nicju majiñami weenami sufraquičha watay wata.

PAJK CHIW MANTIZ PUESTU

¹¹Jalla nekztanaqui tsjii pajk chiw mantiz puestu cherchincha.

Nižaza nii puestuquiz tsjiiqui julzi želatčha. Jalla nii julzi mantiñiž nuž želan, niž yujcquiz arajpachami yokami k'ala katchičha. Nekztan ana iya arajpachami yokami želatčha. ¹²Nekztan ticzi žoñinaca cherchincha, koltami pakjimi, mantiñi Yooz yujcquiz tsijtchi. Jalla nekztanaqui Yooz liwrunaca cjetžtatačha. Nižaza yekja liwru cjetžtatačha; liwriita žoñinacž tjuu listichiz liwrutačha. Nii Yooz liwrunacquiz tjapa žoñinacž paatanacaqui apuntitatačha. Ticzinacaqui apuntita paatiquiztan jama pjälžtatačha. ¹³Jakziltat pajk kotanacquiz ticztčhaja, jalla ninacaqui Yooz yujcquiz intirjitatačha. Nižaza jakziltami ticztčhaja, nižaza ticzi žoñž yokquin žejltčhaja, jalla ninacaqui Yooz yujcquiz intirjitatačha. Jalla nekztanaqui tjapa žoñinacaqui ninacž paatiquiztan jama pjälžtatačha. ¹⁴Ticzmi nižaza ticzi žoñinacž yokami ana iya želaquičha. Asñi ujquin tjojtatačha. Nii asñi uj kotquin sufrisqui segundo ticz cjičha. ¹⁵Jakziltiž tjuuqui liwriita žoñinacž tjuu listiquiz ana žejlčhaja, jalla niiqui asñi uj kotquin tjojtazakaztačha.

EW ARAJPACHA EW YOKA

21 ¹Jalla nekztanaqui ew arajpachami ew yokami cherchincha. Primir arajpachami primir yoka katchicha, nižaza kotami. ²Nekztanaqui wejr Juanqui ew Jerusalén watja cherchincha, Yooz arajpachquiztan tjoñi. Jaknužt tsjaa zalzin turqui persun tjowažtajapa tjacinžlaja, jalla nižta zuma tjacžtačha ew watjaqui. ³Nekztan arajpach mantiz puestuquiztan tsjii jora nonzinčha. Altu tawkžtan tuž cjichičha:

—Cheržca. Yoozqui žoñinacž taypiquiz kamčha. Yoozqui ninacžtan

chica kamaquičha, nižaza nii
 žoñinacaqui Yooz wajtchiz žoñinaca
 cjequičha. Jalla nižtiquiztan Yoozqui
 ninacžtan chicaž cjequičha. ⁴Yoozqui
 ninacž kjaz kaajmi chjujžinaquičha.
 Nižaza ninacžta anaž iya ticz
 želaquičha, nižaza iya kaazmi,
 llaquizmi, sufrismi anaž želaquičha.
 Jalla ninacaqui k'ala watchiċha.

⁵Nekztanaqui nii mantiz puestuquiz
 julzñiqui tuž cjichiċha:

—Cheržca, wejrqui tjappacha ew
 paa-uċha. Tii cijra. Tiiċha werar
 takunacaqui, nižaza ljiċtum takunaca.

⁶Jalla nekztanaqui cjichiċha:

—Tjappachaž jazic žeržta. Wejrtċha
 primirquiztanpacha, nižaza wiricama,
 jaknužt tsjii litranacaqui “A”quiztan
 kallantiċhaja, nižaza “Z”quin wiricama
 žeržaja, jalla nižta. Jakziltat kjaztakaz
 zuma kamaña anċa pecċhaja, jalla
 nižquiz nužullakaz zuma kamaña
 tjaata cjequičha, jalzurquiztan
 žejtñi kjaztakaz. Wejrqui nii zuma
 kamaña tjaa-aċha. ⁷Jakziltat tjapa
 anawalinacquiztan atipaċhaja, jalla
 nižquiz irinsažtakaz tii zumanaca weriž
 tjaata cjequičha. Wejrqui ninacžtajapa
 Yooz cjeċċha. Ninacaqui wejt maatinaca
 cuntaž cjequičha. ⁸Ana wejtquin
 kuzziz žoñinacazti azupri uj kotquin
 chjatkattaž cjequičha. Jalla tižta
 kamañchizza nii žoñinacaqui: Yooz
 nicñinaca, Yoozquin kuz ana tjaañinaca,
 ana zuma kamañchiz žoñinaca, žoñi
 conñinaca, adulteriuquiz ojklajñinaca,
 yat'irinaca, žoñiž paata yooznaca
 sirwiñinaca, toscara chiiñinaca. Jalla
 ninacaž ašñi ujquin castictaž cjequičha.
 Jalla nii ašñi uj infernuquin ojzkui
 segundo ticz cjiċha.

EW JERUSALEN CJITA WATJA

⁹Tuquiqui cherchinċha pakallaw
 anawalinacaqui pakallaw

anjilanacžquiz intirjitataċha.
 Jalla nekztanaqui nii pakallaw
 anjilanacquiztan tsjiċqui wejtquin
 tjonċiċha. Jalla tuž cjican, ċiċiċiċha:

—Pichay. Amquiz tjeeznaċha,
 Uuzažtakaz Jesucristuž tur.

¹⁰Jalla nekztanaqui Espiritu
 Santuqui wejtquiz tuž cherkatchiċha.
 Wejrqui pajk curquiz ċhjċhtataċha.

Jalla niwjctan pajk zuma
 Jerusalén watja wejtquiz tjeeziċha,
 arajpachquiztan Yoozquiztan tjonñi.

¹¹Nii watjaqui Yooz honorchizza;
 nižaza llijatċha Yooztakaz. Llijñi
 maztakaztaċha llijñatċha jaspe
 maztakaz, nižaza ispijužtakaz. ¹²Nii
 wajt muytata pajk pírka želatċha,
 tuncapan zanchiz. Zapa zanquiz tsjii
 anjila želatċha. Nižaza zapa zanquiz
 tsjii tjuu ċjijrtataċha. Nii tuncapan
 tjuunacaqui Israel žoñinacž t'akanacž
 tjuutaċha. ¹³Nii pirkataċha tuwanchuc
 ċhjep zanchiz, užachuc ċhjep zanchiz,
 warchuc ċhjep zanchiz, tajachuc ċhjep
 zanchiz. ¹⁴Nii wajt muytat pírkaqui
 tuncapan maz simintuchiztaċha. Nii
 tuncapan maz simintuquiz tuncapan
 Jesucristuž apostolunacž tjuunaca
 ċjijrtataċha.

¹⁵Jalla nii wejtquiz ċhiiñi anjilaqui
 kor miriis parchizza, nii watja
 miriisjapa, zanami pírkanacami.

¹⁶Nii watjaqui isquinatutaċha, porap
 kjuttan igualataċha. Anjilaqui kor
 paržtan watja miriċiċha, 2,200
 kilometrotaċha, tsewcċhuc altu kjutñi,
 nižaza latuquin igualataċha. ¹⁷Nekztan
 pírka miriċiċha. Nii muytat pírkaqui
 sojta tunc pusin metro miriċiċha,
 žoñiž metružtan miriita, jalla nuž.

¹⁸Muytat pírkaqui jaspe maztan
 pírkitataċha. Watjaqui kori puru
 kjuyanacċhiztaċha, limpu ispijužtakaz.

¹⁹Nižaza wajt muytat pírkiž
 simintunacaqui c'achja maznacžtan

alajitatacha. Primiriqui jaspe maztan, segunduqui zafiro maztan, terceruqui ágata maztan, cuartoqui esmeralda maztan, ²⁰quintuqui ónice maztan, sextuqui cornalina maztan, septimuqui crisólito maztan, octavuqui berilo maztan, novenuqui topacio maztan, decimuqui crisoprasa maztan, unodecimuqui jacinto maztan, duodecimuqui amatista maztan. ²¹Nižaza nii tuncapan zanaqui tuncapan perla maznacžtan paatatacha. Zapa zanaqui tsjii perližtankaz paatatacha. Wajt chawc calliqui kori puru paatatacha, limpu ispijužtakaz.

²²Wajtquiz ana timplu cherchinča. Tjapa azziz Yooz Jiliržtan Uuzažtakaz Jesucristužtan, jalla ninacaqui wajt timplu cuntača. ²³Nižaza nii wajtquiz kamcan, anaž tjuñimi jiižmi pecasača, kjanžjapa. Yoozpachaž kjanča, Jesucristužtanpacha. ²⁴Nacionanacquižtan liwriita žoñinacaqui Yooz kjanquizkaz ojklayaquiča wajtquiz kamcan. Nižaza yokquiz mantiñi reynacaqui nii wajtquin honora zjičcaquiča.

²⁵Majiñ zita zana cjetžtaž želaquiča. Nižaza anaž ween želaquiča.

²⁶Tjapa nacionanacž honora chjichtaž cjequiča nii wajtquin.

²⁷Jalla nii wajtquizqui anaž anawali kamañchizqui luzasača. Nižaza Yooz chjaawjkatta žoñinacami ana luzasača, nižaza incallñi žoñinacami ana luzasača. Jakziltiž tjuut Uuzažtakaz Jesucristuž liwruquiz cjiirtažlaja, jalla ninacakaz Yooz wajtquiz luzasača.

22 ¹Nekztanaqui nii anjilaqui wejtquiz tsjii limpu puju tjeeziča. Nii puj kjazqui žeti tjaañi cjiča. Nii kjazqui ispijužtakaztača. Yooz mantiz puestuquiztanami, Uuzažtakaz Jesucristuž mantiz

puestuquiztanami ulnatča. ²Nii puj kjazqui wajt chawc call taypiquiz okatča, puj porap kjuttan žeti tjaañi munti pakatča. Jalla nii muntiqui tuncapan wilta tsjii watquiz pookča, nižaza tuncapan frutchizza. Zapa jiižquiz fruta pookča. Nižaza nii munti chjañinacaqui watjanacchiz žoñinaca čhetinzjapača. ³Nižaza nii wajtquiz kamñinacaqui ana iya casticiz cheraquiča. Yooz Jiliriž mantiz julzmi, Jesucristuž mantiz julzmi nii wajtquizača. Ninacž sirwiñinacaqui nii pucultižquiz rispitaquiča. ⁴Nižaza Yooz wajtchiz žoñinacaqui Yooz cheraquiča. Nižaza Yooz tjuuqui nii žoñinacž ayquiz cjiirtaž cjequiča. ⁵Nii wajtquiz ween ana želaquiča. Nižaza anaž sir kjanami, anaž lampar kjanami, anaž tjuñ kjanami pecasača. Yooz Jiliripachaž ninacžtajapa kjana cjequiča. Nižaza Yoozqui nii wajtquiz kamñinacaqui watay wataž zuma mantaquiča.

JESUCRISTUŽ TJONZ TJUŇI WAJILLAČHA

⁶Jalla nekztanaqui nii anjilaqui wejtquiz cjichiča:

—Tii chiita takunacaqui werarača, zuma ljiitumapanča. Tuquitan Yooz Jiliriqui niž puntu parliñinacžquiz chiikatchiča. Jalla nii Yoozpachaqui niž anjila cučanžquichiča, niž sirwiñinacžquiz tjeezjapa, čjulul wajilla wataquiča, jalla nii.

⁷Jesucristuqui wajillaj tjonla.

Jakziltat tii liwruquiz cjiirta Yooz taku catokačhaja, jalla niiqui cuntintuž cjequiča.

⁸Wejr Juanqui jalla tinaca cherchinča, nižaza nonzinča. Jalla nii nonžcu, cheržcu, nii wejtquiz tjeežni anjilž yujcquiz quillzinča, nižquiz rispitzjapa. ⁹Jalla nekztanaqui

nii anjilaqui wejtquiz chiižinchiča, tuž cjican:

—Ana niža paa. Wejrqui Yoozquin zakal sirwuča, am irata, nižaza Yooz parti parliñi jilanacaž irata, nižaza tii liwruquiz cjiřta Yooz taku catokñinacaž irata. Jalla nižtiquiztan Yoozquinkaz rispita.

¹⁰Nekztanaqui wejtquin cjičizakazza:

—Tii liwruquiz cjiřta Yooz taku ana chjozaka joojoowa. Wajillaž tii taku cumplis tjuñi žcatžinžquiča. ¹¹Jalla nii timpu tjonan, jakziltat anazuma paacan žejlčhaja, jalla niiqui anazuma kuj paala. Nižaza jakziltat anazuma kuzziz žejlčhaja, jalla niiqui anazuma kuzziz kaj kamla. Nižaza jakziltat zuma kamañchiz žejlčhaja, jalla niiqui zuma kamañchiz kaj cjila. Nižaza jakziltat Yoozquinkaz kuzziz žejlčhaja, jalla niiqui Yoozquinkaz kuzziz kaj cjila.

Nekztan tsjii joraqui cjičiča:

¹²—Nužupan wejrqui wajillal tjonača. Jalla nuž tjoncan premiuchiz tjonača. Zapa maynižquiz tjaača, ninacaž kamtiquiztan jama.

¹³Wejrtča primirquiztanpacha wiricama, nižaza wejrtča kalltiñtqui, nižaza žerzniñtqui, jaknužt tsjii litra “A”quiztan kalltičhaja, nižaza “Z”quin žerzaja, jalla niža.

¹⁴Jakziltat persun ujnacquiztan pertuntažlaja, jalla ninacaqui limpu ajunta zquitchiztakazza. Jalla nii pertunta žoñinacakaz cuntintuž cjequiča. Nižaza žeti tjaañi muntiz frutunacquiztan lulasača. Nižaza ew wajt zanquiztan luzasača. ¹⁵Pero wajt zancu jalla tižta žoñinacaž eclaquiča: tsjii kjutñi kuz tjaañi žoñinaca, yat'irinaca, adulteriuquiz ojklayñinaca, žoñi conñinaca, žoñiž paata

yooznacžquin rispiñinaca, nižaza tjapa incallñinaca, nižaza tjapa toscar taku pecñinaca. Jalla nii anazuma žoñinacaž wajt zancu eclaquiča.

¹⁶—Wejr Jesucristutča. Wejt anjila cuchanžquichinča, tjapa icliz žoñinacžquiz tii takunaca ticlarzjapa. Wejtquiztan David jiliriqui tjoniñča. Nižaza Davidž majchmaatinacžquiztan wejrqui tjoniñča. Wejrtča weenzlak kjantat llijñi warawaražtakaz.

¹⁷Espíritu Santuqui Jesucristužquiz kuzziz žoñinacžtan “Jesucristuqui tjonla” cjiča.

Nižaza jakziltat tii chiita taku nonznachaja, jalla niizakaz “Jesucristuqui tjonla” cjila.

Jakziltat kjaztakaz Yooz zuma kamaña ancha pecčhaja, picha, Yoozquiztan zuma kamaña tanzjapa. Nužullakaz tanznasača. Zuma žeti tjaañi kjaztakazza nii zuma kamañaqui.

¹⁸Jakziltat tii liwruquiz cjiřta Yooz taku nonžaja, jalla nižquiz chiižinžcuča, tuž cjican: Jakziltat tii cjiřta Yooz taku yapačhaja, jalla ninacžquiziqui tii liwruquiz cjiřta anawalinacaž wataquiča. ¹⁹Nižaza jakziltat tii liwruquiz cjiřta Yooz taku t'upznachaja, jalla niž jtuu Yooz liwruquiztan jurtaž cjequiča; nižaza zuma Yooz wajtquiz anaž luzasača; nižaza tii liwruquiz cjiřta zumanaca ana nižtajapa cjequiča.

²⁰Jalla tii takunaca ticlarñiqui tuž cjiča:

—Ultimupan wejrqui wajillal tjonača.

Wejrzakaz cjiwča:

—Jalla nužoj cjila. Amén. Jesucristo Jiliri, jalla nuž tjona.

²¹Učhum Jesucristo Jiliriqui tjapa ančucaquiz zumaj cjiskatla. Nužoj cjila. Amén.